



嘉興府志

ル 5
1574
24



五古
1.574
24

Faint, illegible text visible on the left page, possibly bleed-through from the reverse side. The text is arranged in vertical columns. The right page is mostly blank.

嘉興府志卷五十一

嘉興府知府善化許瑤光重輯

列傳

嘉興縣

孝義

漢

張武吳郡由拳人父業郡門下掾送太守妻子還鄉里至河內亭盜夜劫之業與賊戰遂亡失屍骸武時年幼不及識父後至太學受業每節常持父遺劍至亡處祭齎泣而還太守第五倫嘉其行舉孝廉遭母喪過毀傷父



魂靈不返因哀慟絕命

後漢書本傳

陳

張種字士苗仕梁為宣城王府主簿家貧求為始豐令武陵王紀為益州刺史以種為征西東曹掾種辭母老坐免侯景之亂奉母東奔鄉里母卒種時年五十而毀瘠過甚又迫以凶荒未獲時葬服制雖畢居處飲食恒若在喪景平王僧辯以狀聞起為貞威將軍治中從事并為具葬禮葬訖方即吉陳武帝受禪為太府卿歷位侍中中書令金紫光祿大夫種沈深虛靜識量宏博時以為宰相之器僕射徐陵嘗抗表讓位以為宜居左執其

為時所推如此太建初女為始興王妃以居處僻陋特賜宅一區又累賜無錫嘉興侯秩

南史本傳

唐

邱為文學名世應進士科晚乃得第事繼母以孝聞官至太子右庶子時年八十餘而母無恙給以俸祿之半及居憂觀察使韓滉以致仕官給祿所以惠養老臣不可以在喪為異惟罷春秋羊酒初還鄉縣令謁之為候門磬折令坐乃拜里胥立庭下既出乃敢坐經縣治降馬而趨年九十六卒

至元志參趙圖記

五代

薛仁德吳中戎府右職倜儻好施過崇德堰見牽船人多荷校會令佐來謁因問之對以路當衝要所逋秋稅甚多堰役夫皆是物也仁德問實欠幾何令具籍呈之計九千七百餘緡仁德出橐中金如數償之遂解纜去

劉志

宋

戴顯甫嘉祐癸卯進士選亳州永城尉與母舅杭州陶叔獻同舉進士陶登第纔旬月卒于京師顯甫扶舅喪歸葬迎養其家以終身

嘉興湯志

陳四四嘉定十一年剖心治親疾表其坊曰褒孝即今聯

魁坊也

柳志

項相字汝弼宋甯宗時舉孝廉歷官翰林學士與弟棟汝用虔於奉親兄弟友愛真西山為作孝友堂記

嘉興湯志

聞人傲字彥則安易曾孫輕財好施行閭里具知貧乏者輒囊金夜即貧者戶隙投入不使知其家得之以為天賜也中年未有子相者謂傲領後有黑子十一必有子後得子如黑子之數

嘉興湯志

張仲淳秀州人居鄉教授好周人急務行陰德有商疾篤投仲淳問其姓名鄉里言訖而斃裝有十金仲淳具棺殮召其子護喪持金歸復捐資經紀其葬一夕夢死者來謝曰公今生貴子矣已而生子師中舉進士為館職

終京西曹使尚書工部郎中

兩浙名賢錄

聞人穎立字秀城宣和間為江都簿有寓居何簿者謂穎立曰某之所生亦公之所生實異姓弟兄也疑未敢信穎立事嫡母朱氏孝一日朱語穎立曰汝所生視汝三歲而適人吾視汝如已子穎立感泣述何簿言朱令物色所生張氏張語穎立小字及髻鬣事皆歷歷朱遂令奉所生以歸秩滿何簿欲迎之官而張氏不願偕往遂依穎立以終先是穎立父沒未殯火作穎立仰天疾呼覆身於匱將與俱化火忽回燎後以子符貴贈朝議大夫嘉興開國公

嘉興湯志

陶菊隱名造圖

伊于兩志皆佚其名今從陶氏家譜查補德祐末元兵南下菊

隱聞勤王詔散家財招集義兵以拒元一境獲安授將仕郎謁文丞相于軍宋亡流寓者多以為依戒子孫勿仕元時同邑趙孟僴華亭殷澄稱秀州三義陶四世孫鉦正統七年歲禮出穀二千餘石以賑鉦子澤景泰七年江淮饑捐粟五百石助賑天順五年復運米七百斛至通州應詔助邊賜七品散官

劉志參構李詩繫

元

潘應定博覽典籍母喪廬墓哀號無間有桂花變色白鶴來翔之瑞左丞相周伯琦嘉其孝榜其墓曰雙禎

明一統志

戚敬字秉肅秀之白苧里人母疾救勿效剗股肉以進時母已不能啖而死敬勺水不入口者三日絕而復甦將葬掘地尺餘泉水滲浸敬負土為墳既葬傍徨不忍去或勸之返敬曰吾舍母何之乃結庵墓側三月生白芝五本人以為孝徵又欲像母事之告工以狀工未悉一日工夢姥曰吾戚母也汝為識之翌日工刻木惟肖敬奉如生時張士誠陷吳將逼秀境里中皆遁敬曰吾忍去父母墳墓耶乃散財集子弟保鄉里他所焚掠幾盡敬所居白苧里完好如故公府將賞之謝曰吾為墳墓耳不願賞後部使者薦為文學掾人以其孝不斥其名

直曰孝子云

徐一夔戚孝子記

吳森字君茂其先汝南人後徙居嘉興魏塘任管軍千戶家饒于貲悉推產以歸二兄鞠其弟妹逮有家室推是志也達之鄉鄰饑有米粟寒有纊繒病有藥餌死有棺槨舟梁道路修除惟時輟田四百畝闢書塾聚閭巷子弟延師儒以教之由是人知有學有司上其狀署其門曰義士

黃潛吳森墓誌

項冠字儀甫以富稱散財助婚喪蠲逋負江浙稱長者至元二十年境內饑輸粟數萬賑之全活無算元世祖聞而旌之授以將仕郎少府丞力辭隱胥山築胥山草堂

子衢授淮西廉訪副使

嘉興湯志

戴光遠白牛鎮人鎮遠郡縣學校不立光遠辟地三十畝

為殿于學舍四十餘楹聚生徒百五十輩延名儒黃玠

主之自是鎮人始學

趙圖記

顧德玉字潤之從甯國教授俞觀光游觀光無子嘗語人

曰吾昔寢疾潤之侍湯藥情若父子醫為感動勿受謝

今吾老必託之以死既而訪醫吳中病革趣舟歸德玉

家進次尹山卒明日至構李德玉奉其屍歛於家衰經

就位邦人士為德玉來弔者德玉答拜葬於海鹽近顧

氏之先塋歲時祭享惟謹

輟耕錄

范國寶字谷保數世同居惇友義趙大敏薦諸朝累官安

撫使家居設義倉建義塾著有最樂堂稿

嘉興何志

樂善字為之岳忠武後時有所諱變姓樂為江浙行中書

省架閣庫管勾受知於平章政事徹里帖木耳因哭其

父嘔血卒

嘉興湯志

吳宣字泰然森子有俠氣兄弟析居並以義讓元季苗兵

將屠邑境宣獨叩軍門乞貸辭義嚴正主帥壯之乃釋

不屠著有道德經註子午流註通論等書

趙圖記

李明巒字石友明罄弟縣諸生善古文詩詞與桐鄉錢本

一張履祥交以道義相切磋履祥稱為直諒之友海昌

祝淵抗疏論救山陰劉宗周被逮明巒經營奔走不遠

千里明亡自梅會里赴義同舉人周宗彝募兵守硤石

鎮兵敗還家痛哭嘔血死參高佑鈺自靖錄李富孫梅

里志補

范重雯字松厦為承事郎出守漳州總管張士誠寇湖州

犯構李時雯避地嘉興率鄉兵禦寇保障閭閻里人德

之今俞匯地方有范家橋白鶴橋皆其破賊處嘉興何志

姚福二至正間傾家財輸築羅城妻鄔氏亦傾筐以佐急

公吳志

明

殷近仁博學能文與其弟原善原誠友愛無間家貧親老

協力以供甘旨洪武初以孝弟授山西平遙縣親喪葬

祭盡禮服終以所著蒞政戒銘四十二篇獻于朝擢廣

西參政明一統志

殷原善兄近仁沒於官其妻亦逝所遺三男一女原善撫

之如已出提攜噢煦無不至鰥居不娶其友諷之原善

泣曰兄子猶吾子使吾娶而不賢諸孤將何託且娶為

後耳諸孤在豈無為吾後者終不娶沈繼宗殷原善傳參分省人物考

朱煦父季用洪武初以賢良薦累官福州知府值詔天下

盡革積歲官吏為民害者季用逮赴京師輸作城役病

不能堪時在役親屬告枉者戍三人刑四人煦曰吾不能脫父于此訴不訴等死萬一緣訴而免可無恨乃自縛闕下具告枉狀上悲其意赦季用復官同時得復官者十四人

嘉禾徵獻錄

張瑤字朝貢舉鄉薦性孝其妻以疾不悅於姑姑欲出之瑤心知無罪令歸依母氏終身不娶與兄同孝養內外無間言屢上春官不第杜門隱居郡守徐盈高其誼時枉過咨論未嘗干以私卒無以歛徐為具禮葬之

趙圖記

李進字孟昭力學明五經工篆隸行草母喪哀毀眇一目不復求仕永樂初郡守齊政請為郡訓導不久謝歸著

有西園集

橋李詩繫

包珪包珙

通志作包江誤

兄弟也父愉洪武中詔求人才郡邑交薦辭不受永樂詔取富戶實京師有司疏愉名以進時年七十九長子珪願代父行幼子珙號泣又請身代兄弟爭赴有司旌之

袁志

洪梁少孤事大母及母以孝聞子蒸進士知陳州迎養朝夕規勵云甯失出母失入願家為好人仕為好官有族弟貧為之析產授室表弟趙某以誑誤遣戍梁憐其老而無子代控得免勾補

嘉興湯志

凌孝子失其名永樂中甫冠父以典稅被誣逮繫京師孝

子號慟上書得釋水陸風雨備嘗艱苦竟以是殞人共

哀之懿行編

許章字廷冕與姚綬為中表兄弟天順甲申與綬同舉進

士綬拜廣東道御史章兵部主事奉命安插夷人乘傳

歸築南圃草堂以娛母母喪哀毀致疾卒綬銘其墓章

同年進士姚俊主刑部執法詳平僉事廣東平寇著績

亦以父喪過哀卒吳志參嘉興湯志

章傳普少孤事母孝母患心疾醫藥不能療傳普走普陀

禱觀音大士每三步一稽顙匍匐造之母病傷寒危殆

剖股肉以進皆得痊及卒哀毀過瘠刻木為像終身事

之如生趙圖記

許嘉謨字性初業鋏氏母吳疾作嘉謨度不可救斷小指

半和羹以進母啜而愈里人欲為上狀嘉謨不可曰此

舉也吾母未之聞奈何以為名耶子聯登亦剖股起父

病嘉興何志

岳商字成卿兄夏多子商讓田宅與之別治子舍奉母以

孝謹稱兄弟皆素封及兄卒凡役必肩其難且重者孫

元聲和聲駿聲皆鼎貴咸謂孝友之報嘉興湯志

褚元卿事親孝父病顛天請代及沒淚枯流血母喪哀痛

幾絕水漿不入口者七日廬墓三年屢奉旌獎嘉興湯志

常繼瓚字宋河性孝親沒廬墓三年有友胡皓合門病疫

通門俱絕瓚獨往周旋湯藥里人錢三者密寄金於瓚

往燕身沒瓚召其家人還之著有端慎堂詩集

嘉興湯志

沈鏗字大威少穎敏通經傳父命受辟藩司嘗丞七家嶺

非其好也至官僅閱月得父書歎曰古稱愛日又云以

道養親老矣吾甯戀斗粟遂解官歸平生重然諾慎取

與與人交恂恂相愛鄉里稱長者子光華英華皆有聲

孫思孝自有傳

劉志

陸灼白馬鎮人性孝義好賑施建立宗祠出資佐讀歲祫

出布粟以賑不給者與商人程浙等捐資建萬程橋又

有吳朝陽品行醇潔夙敦孝友郡邑高其義皆為之表

間焉

嘉興湯志

王昇字廷旭正統壬戌歲饑昇出粟六百石發賑年九十

卒其族人彝字叔倫景泰乙亥歲饑出粟二千六百石

丙子饑又出粟三百石成化乙酉又出粟四百石丙戌

出粟五百斛皆賜冠帶又有金昇字彥昇正統辛酉歲

饑昇捐粟三千斛項忠為作墓志二子盛茂景泰癸酉

饑茂捐米四百五十石乙亥又饑盛出粟一千八百石

俱賜旌其卒也忠亦銘其墓

鄒志參嘉禾徵獻錄

沈希冲字方壺鄰有貧無子者買妾贈之及年而其人亡

有遺腹子更撫以成立繇廩貢委進賢篆同官陳某繫

獄罄囊輸納贖其罪鄒元標為之傳著有尚書印宗又

包林芳字泉石嘗受叔氏寄鏹數百人無知者及叔沒

幾十年俟其子長歸之

嘉興湯志

嚴震字宗遠父疾震割股肉為羹進之父立愈同時有吳

槐甯冠者各刲股療母及祖母疾人並稱之

劉志參嘉興何志

陳源

一作陸源

字本深性孝友好施父所遺盡讓之兄弟成化

壬辰歲大祲為粥以食饑者好納四方游士戶履恒滿

詔賜壽官粟帛

劉志

許梧字來鳳事父母孝父病疽顛天以身代遂獲甦苦志

博學以鄉貢司訓通州子燭嘉靖庚戌成進士遂乞歸

歲賓鄉飲

陸光岳字與喬光祿卿崧之孫嘗扶父櫬江行大風斷桅

岳呼天叩禱得安督學李同芳以惇儒慕義旌之

以上嘉興

湯志

包世熙太學生副憲檉芳子萬厯庚辰父邁病幾死世熙

露禱哀號嘗糞以辨甘苦病獲痊五十餘日未嘗解帶

卧久之夢神謂曰爾父壽止六十覺而懼曰吾聞古人

有減算延親者遂書疏禱佛前願捐已算以續父餘抗

詞宣懇淚隨聲注不一月暴下卒

馮夢禎包孝子傳

許生佚其名刻工也性至孝萬歷壬子嘗斷一指療母病

同時士大夫詠歌其事李太僕日華詩有欲調穎叔羹

忽斷般輸指今日怡白頭他日鏤青史

李日華味水軒日記

許錫璋字如季廉憲應達子父病刲左股以進弟病刲右

股以救錫璋早世弟錫瓚撫姪輩如已出俱以孝友名

時有許錫珍張應椿楊時雍亦以母病刲股人咸稱之

嘉興

湯志

施謚字安甫思賢里人幼穎異終日危坐一似有所悟者

父母歿哀毀骨立盡以其產讓諸兄飄然物外徧走燕

粵還抵虎林于勝果寺遇異人張野翁授瞿曇宗旨年

九十無病而逝

劉志

聞人彬字涵虛力學行義事父孝繼母生數子彬皆教養

勿以煩老親及諸弟長以已產悉讓之天啟初里中以

善聞于官屢獎不受

嘉興湯志

聞人昇為肇慶經歷同郡有解軍道病迎致之卒殯于館

歸其喪又有諸生劉用章者見人以貧迫將自溺急止

而周之是秋其人舉於鄉即同邑尚書吳鵬也後用章

貢入京亦授肇慶通判

吳志參嘉禾徵獻錄

費有本號心齋敦倫砥行奉庶母如母撫庶弟有恩中年

喪妻不復娶里中爭延為塾師稱費夫子又鄉民黃守

義妻見有至性鄭友愛兒沒事嫂如母撫姪如子閭里

稱之

袁志參嘉興湯志

呂嘉祐吳賓素朱治恒俱諸生以好義稱崇禎乙亥三縣
嵌田之訟議未決直指左袒嘉善會七縣諸紳集郡廟
議平湖某紳亦袒嘉善時方謁直指郡人乘其出噪而
逐之直指大索噪者人人自危司李方士亮曰吾不忍
網羅多上也遂以三生解按院有張翊者亦諸生也營
救得不死當會訊時嘉祐已創甚昂首言噪鄉紳之挾
私罔上者非噪長官比也噪于途非噪衙門比也士可
殺法可紊乎詰之曰必有豪民倡亂者賓素曰攘田卸

糧人病切膚豈必豪民鼓倡今闔城驚竄生等捐軀代

民為弭亂計可蔓延無辜乎杭司李黃端伯曰此義士

也勿深求乃免入獄擬戍嗣嵌田訟息各赦歸有司歲

以粟帛周三生稱三義士焉姚安為之傳

吳志參嘉禾徵獻錄

周之仁字長春幼孤奉母色養備至念未識父面請畫師

追真肖之事如生母歿躬負土成冢善說書著有翼朱

翼蔡等編又婁拱極亦幼喪父病失父像欲見其儀容

不可得以思父卒子先遠萬厯庚子鄉魁一夕夢父喜

謂曰汝祖像不失第訪之後得於繪師稿中咸謂孝思

所感

嘉興湯志參何志

吳熙亮令鉛山縣以廉平稱天性孝友撫姪如子同時宋鳳翔天啟丁卯舉人令文水縣亦多善行

王應中字鍾甫性至孝痛父祖相繼歿哀毀成疾幾不起生平慷慨好義嘗條陳條鞭等法當時採行之所著有

獨省要言卜筮參同古今氏族考畧等集以上嘉興何志

項肇昌字彥卿諸生孝父母敦同氣獨力婚娶弟妹捐產以周合族慷慨好施舉鄉飲賓子嘉祚康熙丁巳舉人

倡義平糶出粟賑饑亦多善行吳志參嘉興何志

盛泰交字成宇時值旱蝗傾困橐以賑遠近就食者如市又施元章號廣生亦好施尚義嘗焚券以厚貧者著有

桃花溪詩二卷嘉興何志

戴華字君實家貧父病力辦藥餌卒不起華痛哭垂絕以有母在勉自抑以奉母又十餘年母病華晝夜哭甚哀聲達於巷是日忽無聲戶不啟鄰人排闥入視見其母已死華伏母旁面覆著牀已絕矣急救蘇責以大義勉

進粥水里中皆稱曰戴孝子嘉興湯志

高林字字培膠州守文登子諸生萬曆戊子歲饑出粟賑濟時母戴大母趙相繼沒朝夕號泣致病遇家忌強起設奠一慟而絕以子道素貴贈工部郎中

巢祖義字太初以諸生橫經授徒成就者眾錢閣學士升

徐孝廉柳臣其最著也家貧以束脯奉菽水必誠必敬

幼弟屢傾其業割產畀之應貢不仕生平學以誠意為

宗篤行為務疾革索筆大書孝弟勤儉四字以垂訓孫

鳴韶鳴和鳴盛一門友愛廬墓三十年以上袁志

屠宏允字琴山舉人早孤事母孝安貧力學族有以無妄

陷重辟者力為解不令知也丁母艱哀毀成疾卒袁志參張

楊園文集

羅斗章字仲昊天啟辛酉舉人歷宰衡陽早孤事母孝母

病刲股療之與兄共甘苦兄卒撫孤如己子吳志

王永謨字公榮父紀善任三水縣有循績家本饒萬歷末

盜寇充斥利其貲夜劫之眾皆避永謨母鄭年老不能

出盜執鄭將殺之永謨從門外哭入橫卧鄭背曰甯殺

我無傷我母也鄭遂得脫盜砍永謨右臂斷之數日死

其僕王成亦以救鄭死邑人哀之為請旌又有孫鍾琦

崇禎丁丑乙榜盜夜劫亦以衛父傷臂嘉興何志

包麟趾字仁甫泗州刺史世杰子性孝友父卒於官麟趾

方弱冠扶櫬歸哀毀骨立入太學稱能文工吟咏與妻

沈偕隱著有浮峯閣唱和稿吳志

姜非熊字碩年與兄方泰惇友愛方泰沒非熊號泣不已

隨成疾卒又其族有之裔者母疾割股以孝聞有司各

旌之嘉興何志

章吉士居母喪蔬食三載乙酉間有同里吳姓者以金杯

數件託之吉士挈妻子避亂每出負破絮一器不少離

後歸及病革吳適至吉士亟指牀頭絮不能言吳啟之

故物也仍歸吳乃卒張楊園文集案吉士名可貞諸生著禮記纂註

姚某字光虞貧而好義有從母矢節族黨欲奪而嫁之為

養於家三十年不少怠其族感而迎歸焉吳志

江皋字嘿含諸生工詩文崇禎間浹歲早饑皋蠲粟賑濟

鄉里賴之幼喪父如成人母病籲天請代遂得愈丙戌

避亂為盜所傷昏暈中若有神曰江孝子無恙天將佑

汝後得痊子溥舉人袁志參橋李詩繫

徐彬字忠可貢生世瀆第三子世瀆殉難詔立祠時務倥

惚官未及也彬推所居為父建祠至今守焉絕意進取

尚論古今理亂著原治編兼學醫著金匱要畧事繼母

孝撫兄子如己子捐祭田建義塾鄉黨稱其行子煜國

學生煌上海縣丞以廉能課最補新興縣秀水任志

徐廷臣天啟五年母朱病刲股以進撫按表其間子應佳

以母張氏病亦刲股兩世俱以刲股療母有司以世孝

格天額旌之伊志

朱賢字汝賢父鳳邵武教授毀淫祠有聲賢以貢授太平

訓導歷轉沔陽學正歸戶部郎蕭某嘗從賢授經以讞獄至浙有大姓坐法行數百金乞賢從蕭求末減力卻之蕭欲因事以報終不得間也子建侯有孝行

袁志參嘉禾徵

錄獻

史亶字亦元鼎革後自號籜冠道人精于元理年七十七忽示微疾作書與親友別三日後當脫去至期沐浴易衣端坐而逝

徐宏本歲澇家貧無以供甘旨宏本質蓑妻賣櫛易米以奉父母已食糠粃勿使親知也同時有沈恩張漁者皆以孝稱

以上嘉興何志

王士達隱于醫樂善好施夏施帳冬施衣貧而無殮者施棺槨又坊者王龍山勇于為義里中項氏火龍山募人遷櫬之陷火者他若倪存德負米賑饑王文憲沈景哲推財昆弟許聯登刲股療親錢可大完鬻子與棄婚救逋繯及溺子莊聖之鬻妻以養親其孝義皆有足稱者

吳志

徐趾生字朱草縣學生以嗣父石麒恩蔭改名桂臣石麒殉節圍城昌險求遺骸歸左臂以求父尸受箭傷出血過多觸風輒奇痛連遭水火獄訟屢瀕於死後閉戶讀書博覽典籍與同里施博俞汝言為道義交

柚堂文集

國朝

陳良德字爾嘉順治初饑民走掠遍野良德年未冠負母
姚踉蹌奔走菽水無缺稍長棄舉子業行商數百里間
負米養親父卒廬墓三載歲時祭祀必哭終身不怠

江浙

通志

沈士先早失怙事母朱盡孝朱病剗股煎湯以進病尋愈
及母卒居喪哀毀骨立學使者旌其門又王燦戴長淶

姚詢岳亦以剗股療親疾

袁志參
吳志

金昭鑑字子乾祖九成父應秋家饒於貲明季以里役傾

家人

國朝條議賦役萬餘言如均田役清漕政官收官兌革廠夫
站價諸欸入京求言路代題經撫按題允著為例東南
之民咸賴之兄殿鼎亦尙義好施

戴鉉字文生諸生避亂徙新豐里杜門教授疊遭祖父喪
方斂畢寇至里中盡竄鉉獨護柩不去賊加箠楚以實
情告卒保無恙

以上嘉
興何志

黃季瀚字魯生廩生父爲縣吏以錢糧累司檄嚴提季
瀚代解受責創極失聲憲司問之直言代父并訴父寃
憲司重其孝得釋順治丁酉舉於鄉令滑縣有能聲

吳志

參嘉興
何志

黃齊賢字霄聞生子名華登進士訓以義方平生研精性

道博通經史著有孝史詩臆千頃堂稿于志

沈璜字若水諸生見義必為有薛姓者亦諸生鬻其子以

給衣食璜惻然傷之即為贖歸又諸生陳姓其父充里

書逋糧數十金為運弁所辱璜捐貲周之不收其券戚

黃姓雙棺在室貧無以殯勉助其葬葬三日其家被回

祿鄉里稱之買婢諱言其父越日其父來問何業曰業

儒即歸其女又葺學宮施藥石掩露齒著有均田平賦

議兩赴賓筵屢舉優行浙江通志

張德型少孤克自淬勵士林語曰張君學行完瑜澈鏡竭

力奉甘旨母疾剖股母沒廬墓以哀毀卒

朱昌來善事父及後母養生送死不遺餘力葬其叔而讓

產於姪又朱廷輔賀聖銘能周人急亦以孝義稱並舉

鄉飲

徐朱直朱氏子襁褓時嗣于徐曾剖股療母病及母卒徐

之族以直嗣母側室本無子溝其穴於墓東直哀懇不

許忿不欲生投五龍橋下舟過挽出得不死後始知朱

出尋得本生骸滴血試之驗乃哭而掩之後官副指揮

以才幹著仍為徐氏請封焉著有青門集

曹穎濂字濂生績學授經著錄者百人尤敦孝友嘗竭東

脩所入以贍寡姊終老受敬不衰

以上吳志

褚廷璘字遴侯諸生好為地方興利除弊嘗與金昭鑑屠

延禧力陳官收官兌之法又因歉歲設糜以救饑者順

治間學使以德行旌之子蔚綸亦舉德行

嘉興何志

嚴聞綸康熙癸卯副榜六歲喪母哀泣如成人事父孝養

備至家貧遠館間日必趨省雖風雨不阻遇饑疫廣製

方藥并約同志設糜捨棺掩骼行數十年如一日

莊匏諸生嘗買陳氏宅陳乏嗣其祖先神宇朔望供香火

俟其有主然後歸之嘗需買柏木議價定已交其半及

往取乃陳氏祖塋也急止之不追其價

以上浙江通志

曹洪然康熙壬子副榜歷任教諭居恒不離父側侍母疾

衣不解帶夜輒露禱淚漬衣襟及居喪廬墓側哀感行

道每逢忌辰哭泣如嬰兒嘗曰吾沒後當葬于墓傍庶

魂魄長依二親也雍正五年具題奉

旌 浙江通志 參吳志

蔣澄八歲隨父至松陵遇盜澄匿柁側盜擠父將入水澄

躍出大呼盜驚詫舍去又有譚有陟亦隨父自白門歸

父沒舟中未具斂至澣墅關懼詰阻乃佯病抱屍寢及

抵家亦卒同時馬璉金班江日乾高式玉吳宏昇俱以

親沒哀毀致疾卒

江士琇母喪隣居失火士琇伏棺願與俱焚忽迴風返火

以上
吳志

李應魁字坤暘常豐里人家世業農應魁讀書明大義至性孺慕動合古人年十八母徐病劇不可救應魁夜則禱天請代晝則奔走醫藥不解帶不櫛沐者旬日已潛到其左股投湯藥進之母病遂愈父母先後卒居喪哭泣備禮哀毀骨立廬於墓早夜悲號有芝草生於塚年九十卒雍正五年具題奉旌包爾庚李孝子傳

吳煥諸生五歲喪父哀毀如成人母徐曲意承順四十餘年母卒廬墓三年雍正五年具題奉旌浙江通志

王人吉字丹崖諸生性至孝父病顛天請代事母色養備

至母年八十餘卒人吉哀毀成疾杜門十餘年姊妹早寡婚嫁其子女族黨有貧者時加周恤焉吳志參伊志

胡鼎錡字珩玉事母孝讓宅從兄葬族之不能葬者十餘喪生平重然諾敦任恤以田三頃置祭產充春秋上冢及修墓費餘以贍族子泰以例貢任景州知州歷彰德知府孫樹薇知任縣俱有廉聲吳志參曾曰理胡氏祭田碑記

朱永年姚元微馬羲禎徐之璣胡守仁並以讓產稱倪我端盛朝宗陳家慶沈元瑛沈璇沈鳴揚沈開泰沈陳包錕沈棊陸濤吳光漢並以尚義稱屠肅薛珩曹繼章高百揜徐耿震張年卜雲從或著孝行或敦古處皆有足

稱者

案朱永年以下諸人姓氏俱載吳志今無實事可述以舊志所有故並存之

姚潢字水心諸生父病醫藥不效潢禱天割股母于氏病

復割股宗黨稱其孝潢諱而不言

陸夢蛟字華雲有至性曾割雙股愈親疾每好懲勸鄉里

皆嚴憚之

以上嘉興何志

沈茂功年十三嫡母朱病奉湯藥衣不解帶日夜籲天求

代卒不起伏母屍一痛而絕逾時始甦事繼母徐又事

謝亦如之父沒哀毀幾滅性既葬廬墓三年哀感行路

雍正十年具題奉

旌伊志

楊汝霖字瑞文以貢除臨海訓導實學課士康熙戊子已

丑水旱相仍檢討朱彝尊為倡各率私錢為粥食餓者

汝霖踊躍勸募與有力焉子為裘字治良庠生有孝行

著石齋詩稿

伊志

吳文煒字旭超以諸生貢太學康熙壬寅旱文煒首捐賑

勸同志各輸粟共議賑法曰施粥不若施米貧民男女

各有業若枵腹奔走以待一餐則一日之業廢今先計

其家若干口需若干米登籍而給以票三日一賑賑之

日驗票給米如是則民不廢業吏胥不得藉手眾然之

文煒寢食賑所實心任事全活甚眾雍正壬子又饑復

行之當事表其閭于高增為邯鄲令高峻為桃源令皆

以才幹稱

伊志

顧尚文字逸周性孝友多義行年七十餘樂善好施孳孳不倦康熙六十一年學使旌其閭曰風高月旦

伊志

沈英字甸偉襁而失恃父鴻起辛勤鞠育甫成童卽訓蒙以給朝夕家貧父子子處其從祖璜時周卹之旣長念授徒不足以供甘毳遂精六法方駕古人康熙乙酉游京師以諸生薦充

暢春園畫院供奉父病卒訃聞英悲哀擗踊病不欲生星奔南下以毀卒于山東之聊城距父沒纔四閱月以孫叔

珽仕贈吏部稽勳司主事

伊志

劉孝子失其名住新塍鎮少孤母王撫之成立家貧賣粉餌度日母病刲股和藥進病尋愈及母卒哭泣宿柩傍三年如一日雍正間邑令董懿詣其廬送黃鵠慈烏額以表之

伊志

吳士基少喪父哀毀如成人家故貧母沈苦節士基能竭其力凡所以孝養者無不至母卒居喪廬墓皆盡禮弟妹俱幼友愛備摯每念父母哀號欲絕終身如一日乾隆元年具題奉

旌

伊志

范進生字振公承順親意處昆弟篤友愛尙義好施首倡賑濟以博親之歡事之數十年惟謹父母年皆八十餘

卒哀毀盡禮隣有不遜于親者聞范名皆感悟恐不齒于孝子也乾隆二年具題奉 旌伊志

沈俊傑字位三少有至性每遇父母疾衣不解帶籲天請代病皆愈及母卒俊傑一痛幾絕甦而嘔血吐袖中不使父知恐傷父心也父後卒俊傑哭愈痛呼號曰二年中父母皆沒吾何獨生也哀毀半載卒卒之日重服在身屬以衰經殮葬父母塋側乾隆二年具題奉 旌伊志

李志鯉字濟字事親孝兩居喪哀毀過禮嘗于客邸遇逋官稅者哀其急代之輸及志鯉沒其人來哭語其故始知之其陰德類如此伊志

戴公鎮字殿邦年十五父病劇焚香籲天割股和藥以進病尋愈父沒哀毀骨立中年喪偶不復娶伊志

李庭凱孝事父母嘗割股療親疾其族有李期者母邱病篤亦割股和藥進得復甦伊志

王愛字力行父病篤割左股以進病遂愈後精于醫寓硤石鎮著有四氣撮要卒葬紫薇山側硤人立碣表其墓梅里志

倪德臣字振公有至性年十三父病篤呼天露禱卒不起痛哭不欲生母孫患背疽時方溽暑腥穢不可近德臣朝夕以口吮之病尋愈母年九十八卒德臣年亦老哀

毀之誠初不異喪父時也乾隆五年具題奉 旌伊志

周仁母患疾嘗兩刲其股以療疾得瘳臬司陳道基特旌

之塑像土穀祠祀焉 梅里志

鍾顯名號升庵少喪父如成人事母嚴孝母病刺血書疏

禱于天夢神授以方病尋愈母後卒顯名哀毀不欲生

死而甦者再既葬廬墓三年哀號如一日顯名嘗遭回

祿兒女不一顧奔赴煙欲中抱祖先父母粟土出遍體

糜爛數年始得痊乾隆十二年具題奉 旌伊志

朱昌辰性好義姑寡而貧欲度其二女為尼為嫁之故人

子欲為僧力為資助返其初服僕諱其姓後知為舊族

焚券善遣之能詩有梅花閣殘稿伊志

徐琳字荆山居梅里究心理學與同志倣唐灝儒張考夫

為允安會以葬不能殯者又舉廣慈會以施棺槨 伊志

王楚仁居梅里舍傍有宋時梅釀酒具蔬供客游取貲以

奉母早年得奇疾遇異人與藥貼患處及去藥一白色

蜈蚣隨之出病遂愈人以為孝感云 繆綏武雪堂瑣錄

王三寶乞食以養母母病三寶輒不食母死不復行乞數

月以毀卒同時某孝子者本農家子母患瘡臭穢不可

近孝子以舌舐之數月愈母沒廬墓四年二人皆王姓

一嘉興梅里人一秀水聞川人 伊志

莊嘉字昇瞻雍正丙午副榜已酉以保舉授戶部主事外
艱服除改補中書舍人乞養歸生平尚義好施乾隆乙
亥歲祿嘉首捐二千金設法賑濟並勸好義者各出貲
以助全活甚眾事聞奉

旨晉級 伊志

俞元龍字約園有至性父喪於風雪中躬負土成墳家居
南湖濱讀書不入城市生平多義行稱長者乾隆甲戌

舉鄉飲賓 伊志

吳廷薦弱冠時嫡母孫邁危疾百藥勿痊廷薦念世有判
股以療親者夜靜屏人割一臍和飲以進母病果瘥 祝維

誥吳孝子傳

李宗仁字乾三明整孫性至孝父陳常任揚州鹽政病亟

宗仁剖左股和藥以進母陳病復剖右股居喪哀毀欲

絕著有養恬山房詩文集 伊志

金陳登字禾箱父兆篁嘗讓產於弟居喪哀毀損一目以

孝友稱陳登積學砥行雍正癸卯舉人淡於仕進性友

愛與弟斯箱同爨精醫濟世著蔗餘集子學超立品敦

行由拔貢任昌化訓導壬午鄉薦任麗水教諭 伊志

董廷魁字殿傳性好義乾隆丙子歲饑出粟數百石全活

無算郡守李公星曜表其閭曰春生黍谷又陳瑞龍字

祥雲乙亥丙子間捐貲助賑里人德之知縣張元文旌

之曰梓里稱仁伊志

金廷炎字質威少孤事母孝母病與弟廷琛籲天請代且
割股以進廷琛夫婦早世遺三男二女廷炎撫之皆成

立伊志

杜嗣宗字紹先母患癘醫勿效嗣宗禱於城隍即神前出
袖中刀割股和藥以進母病愈又有鄭天榮者母病篤

天榮剖胸取血調藥進病亦愈伊志

張昆祖母患背瘡昆以舌舐之日凡數十次瘡尋愈父死
于吳瘞叢冢間棺朽骨露欲扶襯歸不可辨乃嚙指滴

血驗之得歸葬伊志

張桓及弟信皆有至性母病篤兄弟同時割股以進各不
相謀也後為人所知因繪棣萼聯暉卷歌詠之伊志

朱天佩字觀揚諸生父目眚天佩每晨以舌舐之遂復明
嗣患病割肱和藥進病亦愈及父母卒哀毀盡禮生平

敦友愛無間言讀書教授鄉里重之伊志

盛洪例貢生好施予乾隆乙巳歲祲與弟潮源捐粟以賑

每日計口給米閱兩月甲寅秋復與弟設糜以救饑者
巡撫吉慶給尚義可風額表之又有周永春者丙戌輸

粟助賑郡守以志存任卹額表其間伊志

車宗祈字聖昭性孝友父病篤刲股以療父沒幼弟四人

撫之皆成立天性之篤有人所不能及者伊志

謝觀瀾幼秉至性年十二隨母汲水母失足落河觀瀾卽

躍救賴隣里赴援母子得免父客粵東病困旅次觀瀾

時年十六聞信前往過鄱陽湖舟覆獲免隻身抵粵傭

書以供湯藥逾二年父病痊偕歸止宿玉山縣旅店鄰

火焚及卧房觀瀾負父出火又常吮母目疾復明卒年

六十嘉慶間旌于志

李懷英秉性孝友四歲失恃哀毀若成人父茂松喪偶不

再娶然性嚴厲懷英年五十餘稍不如志猶被鞭笞懷

英益加歡愉人問之英曰年過五十猶有父責人生樂

事無過於此懷英終鮮兄弟視再從弟乾三友愛無間

教育其子無異己子後父故廬墓數年有終身之慕焉

卒年六十七道光五年旌于志

鮑晉父文謨母吳氏晉生未晬而孤母以孀居艱苦成疾

晉事之盡孝乾隆辛巳鄰火燄及母樓晉上樓負母由

前窗躍下晉傷足而母無恙樓後壁燬反風火息舉家

獲全母常病劇諸醫不效晉日禱于神一夕夢神告曰

汝母病惟謝敬孚能療次日卽延謝診視得漸次就瘥

晉自弱冠侍母疾無故不去側蓋數十年如一日云年

八十一卒道光五年 旌于志

張灝號逢原年十一喪父哀毀如成人母治家嚴色養備至母壽施材數十具捐貲鋪路人稱為壽母街有孀婦張趙氏無依遵母命養之終身母故哀痛幾滅性力疾營葬廬墓九月竟以毀卒道光八年 旌于志

沈學詩字志和廩貢生母年老視膳問安無少忽疾則奉湯藥靡倦居喪哀禮兼盡有弟二人次早卒遺孤三齡拊鞠倍勤周濟里黨貧無以斂者嘉慶甲子浙西潦里之古南寺分設粥廠立木柵分別男女獨任董率並出已貲造浮橋渡人已卯旱率同里渡河引水以廣灌溉

餘若恤嫠助葬諸善舉無不踴躍從事于志

沈鼎父世德母顧氏俱登耄耄鼎承歡終身靡有遺缺初家貧不給父母憂戚鼎怡顏解慰竭力奉養遇有不足恒自受餒父母不知嘗尋父金陵途中獨夜落水旋援浮木得免人謂孝感之應道光十一年 旌于志

朱文本事親盡孝繼母疾篤因割股燂湯以進病遂愈于志秦廷桓字匡周事繼母以孝聞母病劇割股以進母沒自痛禱祠不虔卒得危疾死于志

岳廷枋字仲瑜性情伉爽好讀史工韻語善書畫精篆刻知琴理少有至性嘗剗左股以療母病後父病劇又割

右股以進病卽瘳及父母歿居喪哀毀廬墓三年乃止

著有醉六居詩草載入濮川詩鈔于志

周疇錫字書洪歲貢生早孤事母曲體其意并事寡嫂如

母撫幼弟成立友愛無間冬夏施襦葛以寒煖相更代

至老無倦意焉于志

王元臯事母盡孝母因汲水墜河救起踰時始蘇鄰王姓

失火時病瘡未瘳聞火力疾而起從煙燄中負母出後

母雙目瞽爲舐數月竟復明于志

沈鳳翬字梧亭性仁厚敦尚孝友奉母九十外能先意承

志好善不勸戚鄰有不克葬者力爲襄助于志

邱光華號旦齋補弟子員食餼有聲性純孝母祝疾醫藥

罔效時年尚幼禱於密室封股和藥以進遂愈卒年四

十二著有三畝草堂詩鈔于志

王宗桓字思正號澹庵新篁里人乾隆丙午歲祿倡議分

米借張芑野製水龍築丁溪橋闌人稱便捐祭田五十

畝以贍族從姪女歸洪佩玉貧而寡衣食終其年精醫

學工書畫著肆雅樓詩鈔儀徵阮文達採入兩浙輶軒

錄葬永十三庄嘉定錢大昕撰墓志同邑錢楷書墓志

銘後嘉定李賡芸題表墓石于志

王宗槐字景希桓弟兩執親喪毀幾滅性乾隆乙卯構李

南鄉饑倡議平糶性恬澹不慕榮進好學古大家詩文

富藏碑刻書畫嘉定錢宮詹大昕撰墓誌銘于志

蔣翰字慶昇事親孝撫幼弟慈好施與遇水旱偏災輒先

出粟米以贍餓者戚鄰中有貧不克殮葬不能婚嫁者

一力扶助不欲人知于志

周定淮字桐源友愛性成有善舉率先倡首如浚市河修

市橋以及賑饑恤貧施給帳襦皆樂為之于志

唐元祥新豐人生平好施與嘗倡建瘞骨塔以收暴露枯

骨捐田畝以為經費又倡建眾歡橋行人德之于志

周世琳字客槎立身醇樸歲饑家有餘粟減值以糶鄉人

賴之暇時鼓琴自娛兼工書法能詩著有雲怡集妻姜

氏亦能詩著有隔塵小詠于志

沈鉞號卉堂鄰族有稱貸者概不取息歲祲倡捐平糶設

單置簿釐然有法其餘周貧恤嫠諸善舉不可枚數于志

周以燦號又新國學生積學精醫遇貧病者不取酌無藥

貲囑向某舖取藥歲終無歸輒代為償冬無襦者授之

以衣卧夏簟者則與之席親友稱貸無吝意逋負不還

者約數千金臨終囑燬其券于志

張鎮字起也監生家里仁鄉幼孤秉母節孝王氏教刻苦

敦學行撫兄子三俱成立精醫學不受人酬自乾隆乙

亥至嘉慶戊辰五遇歉歲率先餼里人粟里有太平南
星兩巨橋易輒為石並率先更建階州邢澍撰傳

徐澍字瀛洲國學生明初虹橋處士十三世孫家新行里
少孤好善嘗焚貨券數紙減所自奉贍親族之生不能
養死不能葬者遇歉歲賑助尤力著谿南老屋詩卒年

七十有五于志

何文奎字秀章嘉慶十九年災助賑銀孫德隆克承祖志

建石梁張家兜里人便之于志

周鳴盛字桐北諸生父槐卿以七月卒鳴盛號泣達旦者
數旬鄰里感歎俗以七月晦為地藏誕均地燃燭至是

為之罷時人方之王脩罷社平時與馮登府史大勳屠
雲堯結梅溪四友立誓書砥礪學行月必互課所業有
曠者令出陌錢歸大勳處歲終計數多寡為恤貧費梅里志

志參新纂

史大勳號竹南庠生能以至孝幹蠱父卒蔬食三年侍母

扶持抑搔曲盡微不至沒尤哀毀逾恒梅里志

王家幹字東臯遺腹生少服賈年四十餘復讀書入庠事
母能養志近支無後者喪葬數十次均獨任之助友人
棺陽拒而陰致不肯道所從來梅里志

及鳳儀字邦清府庠生早失怙母歿哀毀骨立繼遭祖父

母喪獨力經營不責助於兩叔後一叔客死温州卽赴海濱負骨歸葬年三十二喪偶不再娶

梅里志

戴光榮字庚辛諸生年十一割股療母何氏病父桐主講粵東瑞光書院客死潮州賣卜遠行並攜幼子培成偕走八千餘里覓父櫬歸錢塘戴文節熙為繪負骨歸葬

圖著有抱璞齋集同治七年

旌梅里詩輯續補

陸焯字庚明晚號味菜翁國子生力學好善慨舊家子弟因貧廢學集募餐資於邑東化成菴設義塾顏曰潤珍先是角里街舊有塾尋廢弛復修整之焯朝課子于家午至晡課塾攜徒回借子夜讀立并日課程塾徒多所

成就子坦中亦以廩餼名於時著蓬華吟困學錄纂

張湘字槐塘幼時輒喜言善果長營業充裕益好施與給錢濟餒曰扶老製衣卹寒曰熙春歲丙寅江以北滬霖為患道殣相望湘適過東臺興化老幼哀乞遂傾囊錢千緡徧給之里中值偏災亦率先輸粟以賑嘉慶丙子

得請

旌建坊表

梅里志

譚君芳字香谷邑庠生貞默五世孫教授餬口盡孝友重然諾吳縣潘文恭未第時耳賢名聘入塾時以貞默見聖編著作堂遺稿講授文恭顯絕不與通書乾隆癸丑卒正文恭廷試之年逮嘉慶甲子文恭視學來浙訪後

裔知無嗣乃選地葬之

潘世恩撰傳見譚氏家乘

朱天衣字嘗齋廩生鬯父行誼端慤侍父西林病劇割股

和藥以進與人交無疾言遠色至于以非義則凜不可

犯盛暑不袒裼律已極嚴

橋李詩繫續

陳壽齡字介眉業賈奉事嫡母鄭生母沈盡孝鄭患傷寒

醫藥罔效爰割左股煮湯進患漸瘳以庶子療嫡母病

人咸以為難云

梅里志

周鎮山本姓李隨母嫁於常豐里周氏及長欲尋父骨於

母前立誓不覓骨回當投水死遍訪李氏遺墓幸土人

指點血滴其骨而還隣人田枌詩以記其事

橋李詩繫續

徐本豪字蓼庭六齡失怙母病篤跪竈觚前割股昏暈倒

於地為婢所覺傾爐灰按之移時乃甦遂和劑進母尋

卒創痕潰爛輾轉苦出累月始瘥友愛兩弟每食必偕

子二東煌南薰長幼數十人同居無間言立愛敬堂以

寓友于之意亦克承家法云

新纂

姚丙禧字遂秋軀體豐偉嗜學成癖家饒貲財不問生產

手圖書勿輟也結麗澤文社名流麇至輒與抗衡早廩

於庠中道光己酉科舉人由員外郎銓發江蘇候補道

培養心田尤仁厚己酉水災曾捐緡錢萬串同城兩邑

紳富如郭椿周文杰陳錫堦吳錦章等相繼各出鉅萬

災氓得沾實惠皆丙禧首先倡導食其德焉

新纂

吳家駒字能干家驥字雲驤均國學生幼失恃事繼母及祖母極孝道光己酉咸豐丙辰旱澇頻仍籌辦賑飢率為鄉里倡庚申郡城陷有避地石佛寺者特設施粥廠與同里俞璋勸募全活無算璋家有藏書尤通曉六書著有說文辨字

新纂

吳培穀農家子住鳳喈橋性退讓奉父無情容嘉慶十年

父歿哀毀得咯血疾病篤顧謂子曰吾茲獲侍父於地

下吾志少伸言訖而逝

徐錫可小蓬壺詩集

周晉錫字楚江邑庠生住新豐鎮樂善好施凡修治橋梁

道路恒身任其勞工堅費省眾取則焉生平服膺張楊園文集寒暑不釋手又熟形家言孳精邵氏皇極數時有超悟于咸豐時知亂將作思擇善地以避最後得于高家埭築數椽攜家徙焉粵匪至鎮被蹂躪而新居無恙

新纂

張震字養源號蘭谷國學生有至性事母蒯氏盡孝母病

篤默禱於竈神願以身代母病尋愈而震卒

新纂

高金鑾國子生讀書樂善咸豐辛亥舉鄉飲介賓子百齡縣學生庚申四月聞蘇門警報勸父行父云恪守先祠效死為潔遣細弱散僮僕越宿郡城陷焚掠及居廬父

子偕死於火隔河三豐道院羽士親見百齡屍糜爛未

盡為掩覆殘骸云新纂

陳鎬字配京少孤每言及父母或遇家祭忌日拜跪必淚

被其面至老猶然兄弟三人共賈臨財推贏受絀終身

無怨言鄉里有陳好人之目年八十七終新纂

文苑

唐

邱丹官諸暨令歷員外郎隱居臨平山與韋應物鮑防呂

渭諸牧守往還倡和錢起李端亦多贈言丹有詩十一

首并聯句諸作及江南長安十二月景詞行世全唐詩參

詩繫案樵李詩繫邱丹嘉興人郡邑志皆失載攷杭州府志貞元時尚書戶部員外郎邱丹退居臨平山墅唐時嘉興屬蘇州臨平為嘉興南境故蘇州刺史韋應物贈丹詩云終當署里門一表高陽族丹荅詩云還同褚伯玉入館忝州人又崔峒送丹詩云春水與寒煙嘉禾路幾干據此則丹之為嘉興人無疑今增入

宋

謝炎字化南蘇州嘉興人為文慕韓柳與盧稹齊名時謂

之盧謝稹巽懦炎勁急反相友善端拱初舉進士補昭應主簿徙伊闕連知華容公安二縣卒年三十四集二

十卷 宋史本傳

呂渭老字聖求有文行以詩名宣和末為朝士歸老於家所存詞二卷計詩百三十餘首同邑有錢諷字正初所

撰回谿史韻附韻類事若干卷 趙圖記參嘉興湯志

康與之字伯可建炎中駕駐維揚上中興十策聲名大振時不能用其後擢為臺郎值慈甯歸養兩宮燕樂與之專應制為歌詞腴艷粉飾世以柳耆卿比之著有樂府

五卷 鶴林玉露參嘉興湯志

聞人滋字茂德璪子喜畱客食然不過蔬豆郡人求館客者多就謀之蓄書喜借人自言作門客牙充書籍行開豆腐羹店曾為敕局刪定官談經義滾滾遂于小學 陸游

老學庵筆記

呂重庚字申伯博學能文端平間登進士第官至大理正

自號九山著有九山集 至元志

徐聞詩字子言資性穎悟八歲通九經理宗朝由童科擢紹定第仕至惠州守 柳志

陳壽博通經史紹興乙卯授慶元路州學政遷院林建炎三年由汴京扈蹕南渡卜居楓涇著有周易附傳諸史

辨疑四卷居易集六卷行世後裔元季避兵安徽至國
初時復遷歸楓涇卽台州知府大溶五世祖

曹相駿楓溪小志參

元

孫固字以貞性恬淡好讀書辟署華亭縣學事與楊維禎
陶宗儀詩筒往來酬倡成帙嘗自題其齋曰聽雪著有

聽雪齋稿 兩浙名賢錄參袁志

陳堯道字宗遠自號竹林居士通五經元亂不仕與楊維
禎輩相倡和所著有竹林集子約字博文綱簡文繹思
文緝熙文皆以家學切磨善言名理爲歌詩自相師友

而約尤貫綜百氏仕明爲大理卿終山西布政使有一

默居士集 趙圖記參袁吳兩志

衛培字甯深涇之曾孫也涇自有傳性端恪博通經史明
於典故延祐七年郡守以培充貢龍虎榜賦文不起草
雖被黜識者推之知州王安貞聘訓導州學號月山先

生所著文十卷曰過耳集 吳中人物志參劉志

黃玠字伯成與趙孟頫黃潛善不喜儲蓄有輒貸人晚值
兵亂益貧困處之泰然爲詩冲淡夷曠後家弁山著弁

山小隱吟錄知非舊稿唐詩選纂韻錄行世 劉志

陸景龍字德陽至順己己舉賢書官明州學正著有湖峯

稿工於咏物

龔端禮字仁夫祖頤正宋時宣教郎充樞密院編修官嘗著服圖端禮淵源有自又復精勤參攷越十載而成五服圖解至順年間以布衣上書闕下尤為有心當世之士

參錢曾讀書敏求記阮元學經室外集

顧深字淵白一作文琛元季入京獻燕都賦不得志歸晚年領

教岳陽同時錢大有字明遠發憤工詩楊鐵崖稱其善

學以上構李詩繫

葉廣居字居仲與鄉人張翬鐫堪為文字交仕至浙江儒學提舉晚年築室西冷橋陶情詩酒著有自得齋集鐫

堪工文詞善古隸隱居魏塘以易授徒有芝林集又同

時有黃魯德亦魏塘人有詩才邑景多其題咏吳志參橋李詩繫

聞人樞字德機郡之望族也嘗從鮑仲孚受業又登江西

夏日孜之門遂通易學至正癸卯中進士授承事郎易

州同知未及上官以疾終柳志

黃魯德諸生有詩名兼善鍼灸無子門人徐中傳其學邑

中古蹟題詠大半出其手筆邵復孺有柬黃魯德秀才

詩如蘭舟夢繞清溪曲杜若花開白晝遲清溪即指清

風涇云魏塘詩陳

明

張翥

一作翼

字翔南先世建德人徙嘉興博極羣書作文敏

捷好為奇語至正乙巳薦于鄉與金綱俱以龍門賦中

高等舉甬東書院山長不就明初徵入禮局事竣賜白

金歸家近陸宣公祠庭有巨梓因名所著曰梓宇集

靜志

居詩話參
橋李詩繫

陶振字子昌自號釣鼈生學於楊廉夫治詩書春秋三經

洪武間薦授吳江訓導嘗坐佃官房逮至京進紫金山

金水河二賦得釋改安化教諭隱于九峯有釣鼈海客

雲間清嘯二集

橋李詩繫

郭秉心字公葵以善詩見推于徐一夔唐肅永樂間有姚

粵字文政亦以詩名與夏原吉相友善以明經授武康

訓導有七香詩稿

吳志參
袁志

王鏞梅會里人洪武庚戌舉人官翰林院編修弟鈞字天

全有合刻詩稿失傳

吳志參
靜志
居詩話

姚黼字廷章宣德間布衣御史綬之父也擅隱居之樂能

寫山水宗岳雪樵工詩日與陳顥韓永倡和優游自得

人以可閒先生稱之顥字漢昭雲間錢博稱其詩閒雅

典厚力追唐人有竹鄰子稿

橋李詩繫

懷悅字用和居相湖南園亭詩酒之會極一時之盛輯有

士林詩十卷後有沈章字宗玉居苧莊畧約相通環以

水竹詩頗崛奇著有苧村集

靜志居詩話
參樵李詩繫

王達字公路永樂甲午舉人會試不第卒業太學謁選得

襄陽衛經歷不就歸授徒自給長于詩賦著有南溪吟

卷管窺集雲溪遺稿

嘉興湯志參
樵李詩繫

包鼎字汝和鼎弟登成化戊戌進士授無錫令與項忠金

禮諸公為耆英會彙詩文為一集從子憲字循之以貢

任湖廣訓導陞山東教諭人以君子稱之

吳志參嘉
興湯志

徐文和嘉靖丁酉舉人任揚州通判罷歸究心理學臨終

語其子曰皇極經世之學不傳矣親操算子與諸子講

論講畢而逝著有蛋湖詩稿

嘉興湯志參
樵李詩繫

彭輅字子殷幼穎異才名籍甚登嘉靖丁未進士知新淦

縣刑部郎罷歸時秀水有范言以文辭與輅相頡頏言

宗韓歐有體裁輅閱肆綺麗出入史漢各負氣不相下

然輅不宜於人官亦不顯著有比部集

袁志參靜
志居詩話

金九成字伯韶父應秋以貢論六合清學田贍貧士以文

行課諸生九成幼警敏善屬文九歲題詩郡齋為郡守

龔勉所重年十二補弟子員萬歷丙子舉于鄉再上春

官不第歸卧武原望虞山著史論史辨各三十卷又別

為元史考誤四十卷詩格在高季迪袁景文之間五言

今體尤為適上子壽明敦行好施孫善鎔以藝事稱世王

貞金九成
傳參吳志

馮元鑑字鑑之萬歷庚子舉人授廬州教諭陞涪州知州
乞歸結廬雙溪之濱高雅善文尤工書法行草及署扁
皆擅絕一時閉戶讀書人罕覩其面同時載灝字升之

丙午舉人亦工書法與元鑑齊名

橋李詩繫參
嘉興何志

鄒衡字汝平憲廟末諸生郡守柳玟延諸生曾春平湖教
諭林光修府志既成衡惜其缺畧復作嘉興府志補嘉禾

徵獻
錄

陳泰交字穉孚性豪舉慷慨慕義同里黃宮詹洪憲見而

奇之為文高古奇崛膚學讀之不能句項進士鼎鉉好

奇文與為莫逆交早卒著有同情先生集

嘉興
湯志

徐宏澤字春門居春波里少曾割股療親疾有孝行家貧

逐什一之利市聲紛呶宏澤下簾靜坐泊如也工詩類

元白畫出入子久叔明仲圭三家書法吳興尤愛張伯

雨時稱春門三絕晚登峩眉窮巖壑之勝及歸詩畫益

工自號竹浪老人子柏齡崇禎庚午舉人任永嘉教諭

為黃道周所重後自甌至閩流離困頓歸亦善詩畫嘉禾

徵獻錄參李日
華徐隱君傳

陳懋仁字無功性嗜古節俠自喜參軍泉州不以簿書廢

鉛槧記泉南事多故牒所未備足跡遍海內晚歸著述
凡二十餘種李維禎嘗曰予周覽天下五十餘年僅得
樵李陳無功一人著有石經堂集子盡謨字獻可篤行
博學精考天文地理象數聲韻皆有師法著有皇極圖

韻諸書

舊浙江通志參
嘉禾徵獻錄

屠中孚字德允康僖公勳曾孫攻苦好學賦性孝友撫孤
姪卹貧交慕義好施知無不為邑令湯齊聘修邑志李
少卿日華總其成一切網羅編輯中孚及陳邦俊為政
未卒業卒子用明復出所存故實以相佐著有重暉堂
聯合軒醉茗齋鄰虛閣愚菴館諸集及嘉興文獻志等

書

嘉興湯志
參吳志

聞人懋字孟晉攻苦下帷數奇不售設帳授生徒四方從
游者眾其談道得良知一派于姚江為功臣為文片紙
落案人爭取之著述甚富

嘉興
何志

莊嚴字銘五嗜讀書纂錄甚富以歲貢除山陰訓導轉靖
州學正士風丕變卒祀鄉賢著有古今詩選山陰倡和
集子曰思字汝立貢成均攻苦績學遠近問業者多所
成就鄉里稱其孝友三舉大賓祀鄉賢著有四書尚書
說準白苧草

袁
志

唐文選字儒章績學砥行言動有法事父母多孝行築室

白苧墓傍讀書教子著有飛虹館尙書稿叢桂軒等草
子堯夫堯岳堯夫以歲薦爲臨江訓導堯岳博綜羣籍
十二補諸生治詩古文詞工書法好施予著有剝廬集

白苧吟堯岳子珏亦有文譽

嘉興湯志
參袁志

嚴錫命字九華歲貢任衢州訓導遷教諭舉鄉飲賓窮居
講幄弟子以次受業著天然子集子觀勳臨並知名

袁志

李貞開字泰卿少攻苦嗜學以貢司訓太平啟誘後學津
津不倦兼長詩古文詞膺薦擢江西會昌令年逾七十
罷歸卒著有北征焚餘涉江燕游姑熟銷夏烟雨樓詩

賦七種

嘉興
湯志

許應培字伯厚少孤有至性精心舉子業淹貫經史擅古
文詞游臨川湯顯祖之門湯重之遣其子來禾就學名
流造請無虛日同郡黃洪憲陳懿典並以國士遇之董
其昌黃汝亨輩尤以翰墨爲莫逆交歷試南北二雍兩
中副車齋志没子鍊諸生狷介如其父

袁志

沈嗣選字仁舉好學能文爲諸生有盛名需次歲薦以親
老不赴天性孝友乙酉奉母避兵葭川盜知爲老孝子
戒勿犯生平破產聚書嘗謂自昭明後代各有選而南
宋缺焉乃輯南宋文選百卷未梓著有儉娛堂集尙書
論語傳等書明人私謚曰孝貞仲子椒衍亦知名

袁志
參構

李詩繫

朱治憫字子暇天啟辛酉舉人選授肇慶通判宣勞戎務

卒于官其詩磊落欽寄不沿時習靜志居詩話

顧猷字若昔隱居教授工詩得中唐法俯視流輩烏程相

欽其名引為布衣交不之許著有桃花里集袁志

顧玘徵字文玉居梅會里諸生履操方潔鄉里畏服之有

十五國風疏讀書臺吟稿禾郡集紀參梅里詩輯

錢應金字而介縣學生以詩詞名城破走村居游兵掠郊

野見殺有古處堂集靜志居詩話

陳恪字子肅善事母與兄恂齊名兵後隱居著癯庵詩草

子與權蒿荃孫廷光並有文行吳志參靜志居詩話

包爾庚字長明御史節曾孫崇禎丁丑進士知羅定州後

棄官為僧終身不入城市爾庚少有文名為制義精深

簡當字字刻入一時攻帖括者皆步趨之著有直木居

詩文集嘉禾徵獻錄

李肇亨字會嘉太僕日華子留意圖書討論藏弄嘗與譚

貞默同主鴛社先後賦詩者三十三人工詩善繪事著

有寫山樓率圃夢餘諸草子新枝琪枝皆以詩繪聞于

時靜志居詩話參橋李詩繫

鍾代英字幼芝嘗游九邊諸大帥幕如李甯武杜敬武皆

尊為上客有傳舍稿質硯草其詩致深而思苦本之工

力澤于性情橋李詩繫

褚廷瑄字耕耘博涉經史寓目不忘崇禎癸酉舉于鄉甲

申後杜門不仕居角里築學圃讀書課子以善書名于

時生平著述頗多皆散佚同時何其仁善寫蘭任知州

歸甘居貧約禾中以褚草何蘭為二絕吳志參橋李詩繫

史遇字于巷崇禎癸酉舉人任江山教諭與諸生屠明簡

布衣李麟友俱以詩名麟友有醒齋吟草于志

案吳志文苑門所載明人尚有牽連書姓名附見於各傳中者如聞人麟郁遵朱克恭馮伯初金慎姚翼陳延齡賀麟薛文炳沈木張志遠徐淮錢熙戴長汎沈章范風仁褚連時蔣人朱復諸家並見明詩綜又朱琳周德

行沈文輝諸家並見橋李詩繫攷諸人本無事實可紀附存於此

國朝

譚貞默字梁生昌言子崇禎戊辰年進士授工部主事假

歸杜門著書有見聖編其間集埽庵詩存雕蟲賦韻史

諸書創立鴛社集里中諸名士相切劘吾鄉稱文學者

自李太僕日華外推貞默云橋李詩繫

黃濤字觀只侍讀學士洪憲曾孫崇禎壬午解元出陳子

龍之門早歲即知名四方名士皆願與交入

國朝為龍游縣教諭秩滿擢滋陽令未赴卒生平著述甚富

長于吟咏有橋李古蹟詩行世

王翊字介人居梅會里少棄舉子工詩古文辭慨然以起
 衰為己任與里中諸子相倡和因有梅里派之稱詩名
 著吳會間陳推官子龍謂其有盛唐之風序其詩詞著
 有春槐秋槐堂等集惜散佚傳者什一詩餘三千餘首
 諸體畢備亦多遺缺翊本狂者而操行高潔張豕宰慎
 言嚴司李正規先後欲官之竟不顧以上嘉興何志
 徐善字敬可世宿季子太僕死難仲子肇梁殉長子肇森
 重趼燕楚白死事狀叔子彬置祠田供祭祀善最穉年
 十一值國變避兵失恃奔竄呼踰長挾書策游稟科舉
 不治從學施博精求致知格物之學晚作易論及徐氏

四易一天易闡圖書也二義易敘八卦也三商易辨十
 辟也四周易明四正八交之旨也又為春秋地名考家
 傳藹谷集流寇紀年莊子注周髀密法會通弧矢六宗
 疏容圓寶珠網璇室洞詮等書晚作泠然子傳以見志
 歿後門人私謚孝靖子觀能詩從子發官運判亦精象
 數著天元厯理清類亭稿吳志參構李詩繫補探丁子復撰傳
 蔣薰字聞大崇禎丙子舉人順治初授縉雲教諭知伏羗
 縣嘗申請革除濫徵夙弊民有抗不輸者作詩勸之被
 彈落職歸以著述自娛合少壯所作詩至萬篇手自刪
 汰有畱素堂集同時羅開麟烏程訓導並善文辭朱彝尊蔣

君墓志
參吳志

潘廷璋字梅巖庠生與俞右吉齊名有褚山樓稿行世鼎

革後棄諸生隱居教授不與諸大老通橋李續詩繫褚
鳳翔禾事雜詠

詩注

程泰京字紫縉博學能文兼工書畫壯游京師歸老清輝

堂自號湖東嬾民見同上

袁株字丹六以貢生除青田學博引疾不赴刻有綺里居

詩稿子揆燮有凌滄閣集見同上

許宗渾字岱雲順治壬辰進士授松江推官值漕運官收

官兌之初弁丁勒耗執法惠民以註誤調用拂衣歸士

民攀畱有薦引者以七不堪辭之著有敬直堂草嘉興何志

李鏡字無塵少肆力於詩古文詞晚歲潛心學易于列史

多發明嘗與長洲汪琬論文契合琬為序其集著有周

易參義史論襲紫樓集李良年行畧

周篔初名筠字青士素性嚴厲慷慨有戴丙鬻女巨室長

將配儉從亟解囊贖而嫁之采石佑寄千金而溺死為

具棺手書招其子傾筥還之歲饑出錢散米食餓者客

京邸時貴人小妻周買自楚詭言禾人認篔為叔將出

拜峻辭之有削三緘贈行者曰挾此可得百金却不受

少時喜讀書自遭兵亂即棄舉子業就市廛賣米有括

故家遺書連船載以鬻者質買得一船積樓下每日中
交易箕筥斗斛權衡滿肆撥亂書糠粃中吟誦不輟與
同里王沔王復旦褚標李麟友金時敏蘭谿范路輩相
倡和著有詞緯今詞綜析津日記投壺譜采山堂詩文

集朱彝尊周青士傳參吳志

周篁字林於路字弁山俱質從弟林於嗜吟咏與竹垞藍
村演溪諸君為詩侶李大令集稱其詩和平衍裕不入
俗諦與管谷不媿塤箎之和生平仗氣好奇每讀黨錮
傳輒拍案而起年八十餘神明不衰猶能鐙下作小楷
著有寒玉樓鷗塘等集弁山性亦喜歌詩與林於同其

才氣奔軼或過之著有弁山詩鈔

沈進字山子諸生工詩與同里朱彝尊周篁酬和人目之
曰朱沈又曰周沈以梅花高館落春草斷垣生句得名
一生貧而介讀書自樂彝尊銘其墓謂可入作者之林
獨行之傳嘗游京師歸自號知退叟著有文言會粹行
國錄東園藍村半巢等稿退叟行吟力圃蕭閒詞袁溪
文稿子翼字寅中歲貢生幼承家學為彝尊高弟隸書
得漢人法性孝居喪盡哀甘露降于堊廬者三

墓志參吳志

李繩遠字斯年縣學生例入國學考授州同知本忠孝之

族世重儒林又早為昆明牂牁百粵之游六年而返所
 為詩風騷漢魏下逮齊梁著有獺祭錄正字通補正尋
 壑外言弟符字分虎少穎悟讀書一過成誦肆力於古
 仗氣好奇為萬里之游詩清空一氣詞則盡埽科臼獨
 露本色尤工駢體著香草居集高兆屬雲閣稿序參
高層雲李符墓表
 李良年字武曾九齡能作文十齡解賦詩與兄繩遠弟符
 稱三李于詩格律甚嚴嘗抄得詩中禁字一卷授學者
 所作奄有唐宋別出機杼于詞近姜堯章吳君特以博
 學鴻詞薦

召試灑灑千言賦詩皆極瑰麗卷被落同時無不惋惜既倦游

歸築秋錦山房弟子著錄甚眾有秋錦山房集子潮偕
 與朱昆田史先震錢是式徐燿然張費源李陳常李成
 大為漁社八子有觀槿伴鶴等集朱彝尊行畧
參梅會詩選
 沈騏字鶴山有懿行與程定鼎扶野尹延英樹百以文相
 友善又陳堯勳明易學徐之福敏文辭徐無能于東暹
 並長樂府曹三秀吳人寶顧清並能詩葉紹泰應元美
 沈廷彥錢浦皆耆儒吳志
 徐無為字初鄰以好客致貧為時所稱查容贈以詩有療
 貧無藥病無資嚼蠟生涯死不辭句蓋實錄也吳志參
橋李詩
 繫

鄭珣字隨始縣學生少治春秋既而嫉胡安國傳義之非投牒更治詩間擬樂府音節出入漢魏間一及諸經疑義講說紛綸闡前賢所未發以是問業者眾遺稿失傳

朱彝尊
壙志

徐梗字庚清梅里自二王之後梗稱詩最早在杜湄周篔之前著有西溪詩草杜湄字晚實其詩清潔高秀有王孟遺音王翊稱其得風人之旨有煙草堂廢園燕臺諸

集
靜志居詩話
參橋李詩繫

繆永謀字天白更名泳字于野諸生無意進取遂棄舉子業學問該博象緯律呂醫巫諸學咸究其精嘗輯嘉禾

文獻錄未就詩尚風格與雲間相近有荇谿集弟其器有遙山堂集子啟武以明經薦知汶上縣有崖畧草堂

集
李繩遠行畧
參梅里詩輯

曹山秀字中峽諸生能詩通經史治舉子業老而不遇與里中吳茵朱彝尊同學相友善多酬倡之作著有散懷

錄
朱彝尊曹
君墓志

高佑鉞字念祖父承埏嘗輯自靖錄記死節諸臣佑鉞續成之博聞強記尤諳隆萬以來舊事著有懷寓堂詩贈炙藝林弟佑鈞子洪謨並能文

吳志

盛遠字鶴江少穎異棄諸生遨游荆楚三至京師嘗客芝

陽刺史黃家遴欽其名與訂交及家遴移守禾郡遠未嘗干以私家遴乃建瓣香閣于南湖濱為遠講學之所弟子從游者眾遠無後祀高士之無後者自林逋以下若而人與同里屠廷楫項奎結三友庵晚築生壙自題詩諸名流皆銘其墓及卒郡人沈時等請于學使即祀于瓣香閣書法董其昌詩尤膾炙人口著有散花錄瓣

香閣詩集

吳志參宜
山外紀

張劭字博山布衣工詩善考核游歷四方諸巨公皆引重之其聲價與遠等有木威道人集吳志

屠廷楫字爾濟補諸生棄去詩酒自娛以農桑課諸子其

於行也不疾時其于詞也必拔俗與同里盛遠項奎稱
 檣李三高士有鹿干草堂集十二卷又同時蔣岍字僧
 果襟懷曠遠廷楫贈以詩有作詩凌陶謝學道尊張程
 句亦有名于時曝書亭集參
檣李詩繫

郭哀采字龍威順治戊子舉于鄉知宜春縣熟于史事好
 議論古人成敗得失喜為詩詩輒工雄渾明秀同里王
 翊論詩頗嚴獨於哀采贊歎不置有西翠樓集

顧仲清字成三諸生少穎悟工詩凡書畫篆刻靡不精究
 工畫蝶題詠至五百餘首時稱顧蝴蝶著有讀左說莊
 記韻急就篇悉數錄名畫姓氏考輿圖韻編扶青閣稿

以上梅會詩選

戴鏃字淑章貢生工詩古文檢討朱彝尊深器重之與昆田多倡和之作四方名流如毛奇齡潘耒諸人皆與交築暖翠浮煙閣一時文酒之會稱盛焉著有六書明辨笑疇詩文集

徐懷仁字元仲梅里人與同里王法字上濤鄭邁字序周皆從檢討朱彝尊游俱能肆力于古懷仁著有柘南集

法有岫雲藝藿等集以上梅里詩輯

朱琪字珣叔貢生授衢州訓導擢江南通判知江都縣以廉能稱旋罷歸事母以孝聞樂善不倦耽于吟咏少從

檢討朱彝尊游彝尊稱其人志潔行芳質美好學為作芷閭記以表其讀書之室著有東谿詩草梅會詩選

徐真木字士白卓犖負奇畱心博雅典籍靡不窺覽詩宗唐音尤善書法鐵筆世推三絕沒後片紙隻字人爭寶

之著有懷古堂集李良年徐士白傳

案真木風雅之士當日諸名流皆推重之吳志列入技藝則人以技掩矣

趙香營字餘村工詩老不得志往往以詩自娛同時有周福柱字白門何元夔字到音皆以詩鳴與香營相倡和

吳志

陳昂字書厓官同知家梅里與朱彝尊父子居鄰並曝書

亭集有同登澱山寺謁秦女祠分韻詩笛漁小橐有題其納涼圖詩云杜甫南鄰也姓朱柴門月夜每招呼新來歸作詩人伴消暑牆頭過酒壺其風致可想見矣伊志

李光暎字子中家富藏書尤嗜金石文字搜羅不遺餘力

嘗哀集諸家辨論撰觀妙齋金石文字畧十六卷子知

敬能承家學孫三才著有茹古閣詩集伊志

郁之潤字霖汝康熙乙卯鄉舉以母老不會試著靜惕堂

集又陸廷模孝友能詩嘗編竹林詩社集

鄭春字玉書七歲能文著學庸要旨毛詩釋義彙雅游草

紀游諸書又儲福海屠旭吳元洲張宏棫皆以詩知名

張鳳異孫昭亦並能文

許雲龍少能文棄學武康熙庚辰武進士選侍衛奏對詩

詞稱

旨出歷參將撫恤兵民多惠政以上吳志

案吳志武科未載許雲龍姓名存以俟考

李琇字補山明愨子歲貢生授蕭山訓導陞處州教諭抱

負恢奇詩多傑構海甯查侍講昇稱其窮而益工著有

道南堂詩集子宣庠生有燕石草從子之棫貢生有崖

涘集梅會詩選

曾安世字濟蒼以貢授浦江訓導手書六則課士浦少

目至是多獲雋地為朱呂講學處因集諸賢說為浦陽

文紀生平敦孝友多義行為詩長於古風朱檢討稱為

禾中作手著有西隨集子郁字嗣祖有寶松慚稿次子

郇字如孟乙卯拔貢授湖北應山令有秋原集

伊志

金介復字晉民康熙戊子副榜嘗從朱李諸前輩游著述

頗富有讀鑑玉合子一篲編子祖端令泰興有惠政

梅里

詩輯

戴錡字坤金國學生少耽吟咏朱檢討序其詞謂兼南北

宋之長嘗入都一時巨公制作多出其手晚主麗正書

院著麗正詩文集魚計莊集二十六卷詞二卷錦繡段

十六卷畫史十卷漢隸字原訂譌說十二卷兄彥鎔字

貢九以貢任會稽學博有聽鶯樓稿燕游草越州詩存

晦堂詩話參毛奇齡越州詩存序

李宗渭字秦川康熙癸巳舉人知永昌府工詩歌擬古務

以漢魏六朝為宗海甯查編修慎行推為畏友著有瓦

缶集弟宗潮字坤四乾隆丙辰舉人徵試鴻詞放歸授

廣西灌陽令文采風流並相推重有二守齋詩鈔

梅里詩輯

葛宗信字行之工詩尤長於史吳給事源起重重其學爭相

延致一時章奏多出其手著有安素堂詩鈔子洪業庠

生精楷法有無隅館集

伊志

聞元晟字茗厓雍正癸卯舉人攻苦力學及門多知名士
乙卯舉鴻詞科執政欲薦之方固辭而閣學吳家騏已
特疏薦終不赴後銓選縣令又以衰老辭著有竹洲詩

鈔伊志

李振鷺字雲客長年曾孫志行高潔工書似歐陽率更詩

尤和雅著有剩舫行稿從弟雋有樸谿剩草梅里詩輯

徐廷棟字枚士雍正己酉拔貢考授教習銓發廣東歷任

縣令補惠來所至愛民勸學治績蔚然著有易義微言

廿一史纂言四六精華諸書伊志

丁錦字觀文孝友力學嘗纂錄諸經疑義及史鑑政治得

失丹黃標注昕夕無間著有經義日鈔救荒書勤有軒

文鈔伊志

許燦字衡紫諸生少工吟詠專力于古自漢魏六代至唐

宋諸家皆能窮源竟委有晦堂詩鈔梅里詩輯同時選

梅里詩者有李稻塍字耕麓詩極流轉有寸碧山堂集

梅會詩選鈕孝思晦堂詩序
參續橋李詩輯

王鴻字澄之篤志好學詩嗜温李上溯騷選與朱惟鑑

陳其源及從兄湘族弟澄並以詩名有蕉園詩稿橋李詩輯

戴源仁字守純授徒梅里之北從弟源潮授徒里南及門

皆盛里中語曰南北學堂戴氏染坊言及門無白丁也

嘉興府志 卷五十一
源仁以歲貢任衢州司訓源潮廩貢生

伊志

任繩祖字萬斯由縣丞陞臨川縣以清慎稱歲祿捐俸倡民輸粟以賑全活者眾能詩尤擅書法行楷皆入妙求

者履滿戶外著有半椽詩草

伊志

曹培亨字汝咸乾隆戊午舉人績學砥行聚書於松風草堂日事鉛槧以著述自娛工詩精篆隸有松風堂集

伊志

楊文涓字一齋諸生善吟咏及隸書往來南北所至皆推重之築室曰鶴巢著有涵山堂集二女素中素書並工詩有煮石軒茗香樓詠物詩等集

伊志

王燮字禮齋縣學生攻詩古文詞雅慕東坡摹著屐圖寄

意弟焯字少愷乾隆丁酉舉人鎮海教諭兄弟並有聲

燮有香林詩文稿焯有兩部鼓吹茲器維則白華堂集

楊謙字子讓廩生好讀陸清獻張楊園之書居梅會里嘗

注曝書亭集刊既成謂門弟子曰昔放翁謂作詩難注

詩尤難吾注朱檢討詩正多遺缺汝曹有志宜搜補之

吳文溥號澹川歲貢生性孝友詩格高澹有淵明右丞風

足跡半天下名公卿咸折節下交晚客今中丞儀真阮

公幕極推重之著有南野堂詩集筆記行世

伊志

錢人杰號毅庵嘉慶乙丑進士由翰林改知山東海陽縣不二年艱歸不復出家平湖招友賦詩徜徉山水自號

東湖釣漁師博覽羣籍工漢隸著有六朝金粉編華陔

吟館詩文集新纂

李岱字迂仙諸生詩學放翁善言愁苦尤工五言如老豈

能忘酒貧無可賣書真貧士詩也間工畫亦淡遠在倪

黃之間著有遺安堂詩草時工詩者周璐字俶載有澄

江雲間等集李炎字名揚有耕雨草周秋光字擷華有

莘野賸草屠雲堯字望之有薇古吟草于志

郭麇徵字景升有西萃草堂詩稿周昶字永日有聽雨山

房漁莊等草郭維城號雲田有雲田詩存郭維垣號耕

隱有耕隱草郭鵬字宏中有杏園詩稿郭鶴字一鳴有

弟錄集均處士嘯歌自適不染塵氛于志

李佳生字天穀歲貢生補新昌訓導少有神童之目與郭

龍威齊名人稱李郭又甯海訓導徐掄元歲貢沈翼太

學生周岐布衣涂允陵徐淳徐寅俱能詩惜稿佚不傳

人皆惜之于志

王俠字天友永康訓導著有晚香亭稿同里諸生屠焯字

昭仲有漁莊集顧仲清字咸三有扶青閣詩草史宣綸

字王言有茗游草史翼經號頤菴有吹篴集史克泰字

左銘有飲綠齋遺稿史先震字卯君有萍園詩草于志

錢淇字欣茲增生著有容膝居詩鈔子棫號雲壽嘉慶戊

午舉人武義縣教諭一生孝友慈仁著有詩集二卷謙

福堂雜著四卷于志

岳鏞字東宣庠生方嚴自矢動必以禮遇有爭必為排解以故里中鮮訟者著有菊譜四卷省齋詩文集八卷伊志

朱振祖字繩武上舍昆田孫桐孫子善書法小楷尤精詩

畫皆得其家學著有醜舫吟草同時以詩稱者太學生

鄭聯字鶴樓有竹礪詩草李宗淮字桐源有小崆峒詩

稟許煥字牧堂有牧堂集于志

沈允坤號竹村澹於榮進惟以事親承志為樂著有隱嘯

閣詩文集八卷于志

汪鉉號慕園廩膳生侍御孫性端重通經藝書法學晉唐

手鈔三通十國春秋不苟一字家藏古帖皆希世珍于志

蔣浩字充之庠生性恬淡詩宗唐賢樂府尤駸駸入古撰

思無邪齋詩鈔畫工山水人物尤擅松石巨障前太守

伊修志以繪圖著于志

曹言純字絲贊號古香貢生刻苦勵學十七史暨各種叢

書名人詩文集摘擷菁英饜飫之家故貧妻女篝燈夜

紡手一編分光硯北掌錄口哦無虛夕勤鈔纂有刪節

水經注本前後貫串最有法工詩畫善倚聲倣江文通

雜體詠唐宋各大家品藻藝林胸有積軸著徵賢堂詩

種水詞

吳仰賢小
匏菴詩話

沈潛邑庠生邃易理宗宋儒自程朱外所夕耽玩者邵子

書也爰推闡義例旁通象數著周易思通圖說于志

馮高椿號春木幼穎悟稱神童十二齡游庠書法秀挺嘉

慶癸酉以拔萃 廷試先得一等覆試報罷歸尋悒鬱

卒新纂

張昌衢字步康嘉慶丙子舉人勵行媚學至性肫摯長於

考證著有禮記地理考經義咫聞又擅填詞李生德郊

曾刊其春陰閣體物詞一卷同時諸生周槐卿朱賢太

學生金稼田亦俱以詩詞著名

李貽德字天彝我郊曾孫戊寅舉於鄉入京邸與桐鄉程

同文善習聞天下山川阨塞形勝以逮治河興屯諸利

弊羅列若指掌陽湖孫星衍纂十三經佚註貽德實分

任之著述甚富有三家詩異文釋詩經名物考十七史

攷異夢春廬詞攬春閣集續梅里
詩輯

馮時桂字林友性嗜學才藻自喜兼工篆刻遊歷西江南

粵間與名公卿相倡和著有歷朝閨媛詩選未刊行晚

寓吳江之平望詩有粵游簇錦等集于志

薛廷文字魯哉年三十五始學為詩一以唐人為宗寓吳

興徑山最久善繪荷以畫自給著有聽雪齋詩鈔于志

鍾鼎號月橋少好遊久客廣陵晚結詩社於里中有月橋吟稿金燕字蘭友有香谷詩鈔徐蓮字潔芳有一枝巢

詩鈔于志

褚鳳翔號大愚諸生耽吟詠隨帶古錦囊盛楮墨乾隆初

與里中汪弋高張瓜田篁園諸名宿作者老會蔣布衣

儀正為繪圖自為記著有太愚詩稿構李詩繫續

陳向中字書綠副貢生父廷煒字昭遠以進士知建平縣

有二觀齋詩彙風雅傳家向中著桐乳巢詩十卷桐鄉

朱沛然結偶圃於鴛湖之濱文譙極盛與祝維誥王又

曾錢載及偶圃五人倡和世稱南郭五子同上

江浩然字孟亭庠生有北田詩臆如詠宋徽宗白鷹圖云

毛羽何須誇白雪官家曾為着青衣寓意深刻少喜竹

垞詩記覽曰博註曝書亭集稱該洽又著韻府羣玉補

杜詩注補鴛湖權歌箋註江湖客詞同上

陳廷琛字石泉錢文端母舅不事舉子業著執柯錄為牧

民者良箴詩名思儼齋多考證故實瓶山詩注曰宋韓

世忠歸隱西湖三軍撫甌懷德壘而成山有峴山墮淚

思焉今指為秀州稅廢酒殘甌缺亦習焉不察爾鬱秀

詩注曰元時有金氏女鬱秀者及笄死葬湖濱親哀之

建浮屠於其上俗傳夷光入吳刺繡於此謬矣同上

盛宗楷字紹堂布衣高士遠曾姪孫著鍾溪竹枝詞自序云乾隆戊子春下帷糜氏垂露齋續大父畊山鍾溪竹枝詞備記古蹟人物風土旁稽野史碑碣兼及故老傳聞取確而有徵焉詠宜山翁詩云絳帷講學菴三里爭誦旗亭百詠詩蓋遠設席里中三里菴著有旗亭百咏

同上

朱廣川原名淞字松溪乾隆己酉舉人大挑知縣署福建甌甯縣邵武府同知有循聲親老改就儒官秉鐸菰城姚江培養人才訓弟子立條諭其治經也寢饋其中行年八十猶丹黃校勘至三四易藁著有周易繹義毛詩

廣訓春秋三傳異同考孫吳子輯註樂章律呂編禹貢

輿圖志政和堂詩文集子嘉金恩貢生著有韻學闡奧

臞仙吟館詩詞稿朱緒曾撰文集序

丁子復號小鶴貢生古文得歸震川家法兼工詩平居肆

力於古學有本源跋徐氏二十四家文鈔持論精當海

昌查氏重脩新舊唐書時沈氏炳震原撰安祿山傳已

佚撫仿補之兼任校勘尤多駁正著有見堂文鈔詩鈔

沈愛蓮詩話

徐同柏原名大椿字壽臧歲貢生澍子世居履仁鄉性純孝居父澍喪哀毀幾滅性舅氏張廷濟指授六書通篆

籀始輯履仁鄉金石文字記古器物銘與海鹽張開福
契交游屐所至凡殘碑零碣下至井欄橋柱瓦當壟磚
摩抄攷證有從古堂款識釋文晚輯竹里詩存新纂

劉與權字壽廬邑庠生介節自持閉戶課徒不干預塵俗
工大小篆畫梅花宗金冬心同時孫慶治號嘯秋歲貢

生亦善書

新纂

徐錫可字可叔歲貢生先所居邑東郊曰碧螺灣有讀書
終焉之志已卜宅城居寫景八詠內譚墳寒雪項瀆晴
漪雖闖闖有山林氣精篆刻分書瘦硬通神平生枕經
蒞史學有本源所為詩皆古健無時態最受知于郡守

瑞元魏塘黃山長安濤引為忘年交唱和講舍間詩分

小蓬壺小青籐館得酒趣齋三集雜著一卷未梓歿後

以其壻吳中丞昌壽貴貤贈二品秩

新纂

褚全德字集齋補弟子員入上舍祖大愚父稜峰均善吟

詠全德韻語承家學卅角卽成羣玉小草飢驅游楚有

驛路行吟信芳草錢塘張孝廉雲璈雄於詩同人酬倡

簡松草堂少許可適偕客三湘七澤間以篇什為羔雁

稱莫逆中年歸閉門授徒著耕硯餘事教法嚴重謂坐

作應對進退須從小學入門弟子稍失儀夏楚毋稍恕

師嚴道尊咸推角里褚先生焉

徐錫可撰褚上舍詩集序

王逢辰字芑亭貢生宗桓孫居竹里父福田字心耕嗜金

石與張廷濟最契逢辰承家學以徵文考獻為事前哲

高承埏刻自靖錄因禁嚴板燬同里沈銘彝覓得稿於

福邨橋趙氏逢辰集贊續刊之發微闡幽有裨名教著

有樵李譜槐花吟館詩自靖錄考略

王鏞字鹿場貢生工險詠與蔣浩邱光華倡和春波里所

梓詩名小鹿柴詩新纂

曹秉鈞字仲謀號種梅又號水雲明經司鐸山陰工書畫

尤擅長韻語著水雲老人詩鈔兩浙名畫記

張慶燾字裕之諸生居張山之麓因號張山樵夫童時即

耽書凡九流百家靡不心游目覽工詩古文為人倜儻

有奇氣善水墨花卉兼通六書專參文氏一燈雅尚秀

勁少游方樸山諸草廬門為文孤高峻拔著茗雲詩鈔

北征楚游草暨玉楮文集羣仙繪幅樓詩餘拙餘印譜

行世飛鴻堂印人傳

陸開誠字漱石諸生喜吟詠授徒餬口晚境益窘居東郭

外荷花池祖遺僅存閤閣宿廳旁壁穿椽掛雖風雪夜

覓句恬如也為車廣文荔浦入室詩弟子吟情軒舉綺

語中有極清真處仁和宋咸熙摘錄警聯入詩話謂風

調不減杜樊川著有花南老屋詩鈔耐冷談

江械原名承柏諸生書法董華亭兼擅水墨畫蕭疎淡遠

豪於酒興酣落筆行草靈動純是化機庚申被賊擄不

為屈死之同時有郭承勳者布衣工書亦歿於難

新纂

張以煊字吉盦畫名重於時性嗜酒列丹青於杯箸間灑

落自喜庚申避亂梅里無立錫地猶提壺解憂醉輒自

恨曰設早習兵家言誓隨里團殺賊奈毛錐子安用何

七月賊犯里兀坐斗室中握卷持盃佯為不見賊也者

然賊知為讀書士也拉與行始怒擲以硯賊揮刀砍之

傷痕遍體越日潰死事聞

賜卹

梅里殉難錄

秦光第原名廷標自山陽移籍來登咸豐紀元榜以勞績

得同知未謁選歿書法米蘇參以飛白尤善倚聲王壯

愍守吳興時愛其才磨盾草檄下筆千言著有行軍法

戒錄寶山蔣敦復序之

新纂

平鏗字慶橋廩監生姿稟高超文宗先正授徒終其身而

崖岸自立不隨流俗庚申殉難名載忠義錄

新纂

朱大紳字幼泉廩膳生素無恒產藉筆耕養親晨餐夕膳

家庭怡如也文尚性靈詞賦尤嚴格律南海羅文俊視

浙學稱巨眼每按郡甄高才生肄業詰經精舍大紳與

焉選刻詠漢史律詩允推傑作舉優行以艱不赴試中

年遽卒

新纂

嘉興府志 卷五十一
徐錦字蘭史咸豐戊午解元才華煥發駢散文學徐青藤
王仲瞿一派杜門讀書世事不顧也生計勿問也平時
弱不勝衣劫後風餐露宿以憂鬱卒著有靈素堂駢文

詩詞稿新纂

隱逸

晉

韓績字興齊其先廣陵人避亂居嘉興父建仕吳爲大鴻臚績少好文學以潛退爲操布衣蔬食不交當世士司徒王導辟爲掾不就會稽內史孔愉疏薦詔徵之不起

宋

謝國光字觀夫咸淳間對策春官言時事剴切主司畏賈似道不使登第補太學生入元不仕御史程鉅夫奉詔搜賢或薦國光輒杜門稱疾以經史自娛及卒遺命題其墓曰安節謝國光之墓以上趙圖記

張葆光市居讀易一日睛突出乃用蕉葉熨眼且熨且讀
 遂超然有得往見黃冕仲冕仲曰如師卦六爻長子師
 師弟子與師在師中吉易之理極分曉易讀葆光曰作
 如此說宜其易也請布算於前敷衍其義冕仲許之乃
 削簡盈箱布算縱橫所謂八陣圖五花陣諸法無一不
 出六爻之數冕仲駭服葆光隱居樂道不求聞達世但
 以葆光稱之

顧謙字自修舉明經三禮二科拜宗城令尋棄官歸隱名
 流高其才成就見焉

元

姚清讀書通達時務為郡書佐廉平慎飭儉伍憚之以不
 能矯阿取容攜妻子處濮溪耕田釣水為終焉計暇與
 田夫野老倡酬嬉遊以自適著有樂章一卷行世以上嘉興

湯志

顧實字仲二家楓涇性樸厚美丰髯當元中葉郡縣迫之
 仕自跛其足以辭生一子命名希逸克承先志自號真

隱

曹相駿楓溪小志

項宏度號胥山居士以貲甲里中志行高潔宋末隱居不
 仕督教子孫讀書好禮作家規二十條元元貞間卒袁志

參嘉興湯志

吳鎮字仲圭性高介隱居不仕工辭翰善畫山水竹石每

題詩其上時號三絕有勢力者求之多不得惟贈貧士

使取值焉作字用畫筆如寫竹狀饒有天趣以愛梅自

稱梅花道人沒時自題其墓曰梅花和尚之塔兄瑱字

元璋常從毘陵柳天驥講天人性命之學以易數推人

休咎多警世有嚴君平之風

吳志參兩浙名賢錄橋李詩繫

錢應庚字南金孝廉元末避亂徙茜涇邵復孺贈詩云美

人只在含雲外破屋依然谷水西具見高致

曹相駿桐溪小志

明

沈啟隆字昌甫其父居吳興元季棄妻子游五湖啟隆徙

嘉興郡城之東水南有園自號南園居士後徙思賢鄉

豁達好施叔子禮仍處舊廬構草亭夏太常景圖其勝

并顏東郭草堂四字鐫石以傳

劉志

吳萬六思賢鄉人義不仕元隱居博學以名德重于時孫

秉新洪武初以人才徵卒于京元孫宗生宣正間有隱

德陶副憲照銘其墓

嘉興湯志

范昌字延碩建文初由太學生考授文華殿中書進元宵

賦稱旨御書聖主得賢臣頌以賜之告病歸里靖難兵

起遂絕意仕進同里吏部侍郎俞山書忠隱二字貽之

里中稱為忠隱先生著有古檜堂諸集行世

嘉興何志

包馮隱居不仕父鼎為池州知府欲棄官歸意未決馮奉書無他言惟左太冲招隱詩而已鼎遂歸

袁志

屠孟元字伯玉父應坡自有傳孟元勵志讀書旋棄去角巾短筇日徜徉山水間出入乘小舟一編自適公府慕其高誼有欲見者輒謝之

李衷元字澹然少好學不樂仕進高隱梅溪以吟咏自適游戲蘭竹落楮人爭購之友人以功名勸者笑而不荅

著有蘆中吟草

以上嘉興湯志

李含章字貞齋以貢除雲夢教諭遷淮藩司教一日讀五柳先生傳遂拂衣歸卜居胥山築春風草堂隱居以終

捐田為漏澤園里人誦之

袁志

戴晉字康侯居牆頭村幼孤慕陸羽為人終身不娶從其叔灝至同里項氏窺天籟閣所藏名蹟遂工畫後寓精嚴寺與方外秋潭高士殷方叔高元雅輩交常游金焦北固間所至必圖其景以贈人曾居郡城之東構別業築土為邱植松其上曰松山又喜鶴洲樹石置小屋於湖濱名蝶華居沒遂葬其間一生高潔不蓄童僕有聞名訪之者輒閉戶不納

吳志參嘉禾徵獻錄

盛龍升字德潛事母以孝聞曾為郡吏棄去精賞鑑著存古錄劄記凡彝鼎奇物書繪真蹟如周公謹雲煙過眼

錄之例多與賢士大夫游同邑太僕李日華為作盛草

汀小傳晚築室于城中編籬植杞菊更號杞菊老人嘉禾

徵獻錄參紫桃軒又綴案省志採紫桃軒又綴作盛德潛

屠曠字闇伯縣學生少孤善事母中歲棄舉子業隱居教

授尤邃經學詩亦雅正不以風華見長弟子從游者眾

脩脯之入輒以賑宗鄰家貧屢空晏如也著有太經堂

集從弟焯字昭仲諸生以能詩通經著有周易大義輿

地考子達有誠齋詩存袁志參王庭屠闇伯行畧

汪挺字無上一字爾陶崇禎癸未進士未授官而國亡南

都稱制授工部主事挺知事不可支遂棄去隱居城東

不復出書法規摹兩晉名流爭賞晚歲以此自給杜門

四十年靜志居詩話參嘉禾徵獻錄

吳志開字丹成諸生甲申後入閩流離困頓數年始歸僦

廛而居屏跡教授故都御史郭都賢雅重之每過從話

舊年八十寄居蕭寺歲饑不得食僵卧卒嘉禾徵獻錄

徐白字介白徙居吳江以諸生久次當貢甲申後棄去隱

靈巖山之下沙有園數畝手一鎌種蔬果以給間作畫

亦遠俗詩幽冷刻深不肯襲前人一字曾以太湖落日

賦見賞于陳卧子不出山者三十餘年有竹嘯庵詩鈔

嘉禾徵獻錄參靜志居詩話

巢鳴盛字端明年二十始就塾不歲餘盡通其義崇禎丙子舉于鄉乙酉渡錢塘江寓蕭寺以觀時事見江東守拒失律遂歸卽墓側構數椽絕迹城市隣里罕見其面築閣可望先壟栽橘百本遶屋種匏制匏尊作五言律以自喻妻錢氏篝燈紡績泊如也持論勉忠孝敦廉恥仿司馬程朱爲家訓著有永思堂集靜志居詩話參嘉志巢鳴盛列人物舊志皆入隱逸今仍其舊傳中附載沈麗日襄日兄弟皆鳴盛弟子又孫鍾瑞少志于學長敦六行著易學心符可人集諸書詳見秀水

丁元公字原躬性孤潔與俗多齟齬畫兼山水人物老而秀工而不纖能書精繆篆詩有奇氣不屑作庸熟語後

髡髮爲僧號願庵其胸中有不可一世者靜志居詩話參畫徵錄

案嘉興何志作詩僧淨涉卽原躬也

繆詩似字孟思時當多故屏跡不入城市勤學工詩著有學圃吟稿同時褚醇字澱爲縣學生亦隱居不仕其詩沈鬱頓挫言不足而意甚長梅里詩輯

[Faded bleed-through text from the reverse side of the page]

藝術

五代

陸晁嘉禾人性疎逸好交尚氣沈湎於酒善畫道像神仙

村野人物遇筆揮灑出於臨時畧不預構南唐李璟聞

晁名欲召之侍者謂晁好縱酒歌舞無人臣禮璟由是

疎遠之

五代名畫補遺參書畫譜

宋

唐希雅妙於畫竹作翎毛亦工始學李後主金錯刀書有

一筆三過之法雖若甚瘦而風神有餘晚年變而為畫

故顛掣三過處書法存焉

宣和畫譜

沈珪嘉禾人初因販繒往來黃山有教之為墨者以意用膠一出便有聲稱後又用對膠法墨成堅如玉石墨工名手自潘谷陳贍張谷之後珪與金華潘衡製作精緻不媿古人珪為人信義何遠避地嘉禾與珪連牆而居觀其手製還自謂已得大概至微妙處雖其子晏亦不能傳也珪年七十餘終晏先珪卒其法遂絕

春渚紀聞參墨

莊漫錄

李甲字景元工畫作翎毛生動有奇趣東坡嘗題其畫曰

郭恕先後一人

劉志

林鏞字叔大正書宗虞永興而近之

嘉興湯志

元

張成楊茂嘉興府西塘楊匯人剔紅最得名其鎗金鎗銀之法凡器用什物先用墨漆為地以針刻畫或山水樹石花竹翎毛亭臺屋宇人物故事一一完整然後用新羅漆若鎗金則調雄黃鎗銀則調鉛粉日曬後角挑挑嵌所刻縫罅以金薄或銀薄依銀匠所用紙糊籠罩置金銀薄在內遂旋細切取鋪已施漆上新縣揩拭牢實但著漆者自然黏住其餘金銀都在縣上於熨斗中燒灰鍋內鎔鍛渾不走矣

尊生八箋參輟耕錄

東谷子居春波門用五星躔度遲留伏逆法推人生年月

日時貴賤禍福毫釐縷析無有不驗

徐一夔推命解

嚴子成字伯玉其先汴人宋咸淳間始祖名秋蟾者來秀州賣藥於竹林巷遂家焉元大德間京師開御藥局徵子成不就時趙文敏邁疾醫不能治子成診之翼日即瘳文敏喜為作杏林圖並繪孫思邈像贈之以子成貌相類也自是稱藥師性好施予笥不畱資年八十九忽語人曰我將往五岳遊仙府也無疾而逝子孫傳其術

稱世醫

劉志

薛如鑑挾相術遊江湖一時名士多與之交楊廉夫高季

迪皆有詩贈之子月鑑孫鑑能世其術

樵李詩繫

彭君實工餞金山山水人物亭觀花木鳥獸種種臻妙

格古要論

盛懋字子昭魏塘人父洪甫善畫懋世其業而尤過之山水人物花鳥種種臻妙始學陳仲美人謂精緻有餘特

過於巧時以吳仲圭墨竹岳彥高草書章文茂筆及懋

山水稱武塘四絕其姪著字叔章能全譜圖畫洪武中

供事內府有御製盛叔彰全畫記

趙圖記參書畫譜

張觀字可觀

一作可風

武塘人善畫師夏圭馬遠尤長模倣後

與同邑盛懋丁野夫吳鎮遊筆力益古勁善鑒古器書

畫

嘉興湯志參嘉禾徵獻錄

朱華玉字碧山武塘人與吳鎮盛懋生同時居同里不欲

以畫藝與二人爭勝乃獨製銀器隱於姑蘇皋橋為一

時絕技天厯間始見賞於柯九思虞集揭傒斯各令製

槎杯為壽世所傳至正乙酉壬寅各槎杯是也輟耕錄參曝書

亭集

明

吳宏道森子見孝義精醫術每療疾愈則令種竹一竿尋至

鉅萬人稱其地曰竹所洪武初召至京師擢御醫子繼

善仕至黃門給事嘉興湯志

嚴貴和字大用修子成之業洪武中任太醫院官時禾中

大疫貴和白郡守捐資施藥全活甚眾

嚴樂善永樂間人精醫理有弟欲毒兄賂樂善下鴆于藥

者出金飾進之樂善擲金脅之曰我姑不發汝隱汝若

更求他醫以殺同氣我必訟汝于官踰年其人感悟來

謝是夜燈花放光發蓮花一朶結為金人形類菩薩跌

坐蓮中長二寸許震澤王太史作燈花記稱為盛德所

感善能運氣及子午按摩法年七十五卒殮已五日隣

人有遇之於西河者以上嘉興湯志

陳以誠字處夢工詩畫尤精于醫永樂間為太醫院判累

從中使鄭和往西洋諸國臨終作辭世詩有九重每進

千金劑四海曾乘萬里船之句吳志參畫史會要

嚴萃字蓄之初業儒貢太學為廣陽江令有惠政居官八

月歸曾覽方書曰此吾祖業可盡忘乎遂精醫理撰藥

性四篇分寒熱溫平之異案嚴氏自子成後有嚴允芳嚴世美嚴錫皆明中葉人能

世其術茲不備列

張德剛西塘人父成善髹漆剔紅器永樂中日本琉球購

得以獻於朝成祖聞而召之時已沒德剛能繼父業至

京面試稱旨授營繕所副賜宅復其家時有包亮與德

剛爭巧宣德時亦召為營繕所副以上嘉興湯志

范摹字行式涉獵經史善詩歌多藝能凡金石款識篆刻

書畫之類皆能著其時代辨其真贋工畫山水人物意

趣幽遠劉志參書畫譜

王立本工畫山水人物師盛懋臨摹逼真子繼宗能世其

業柳志

吳瓘字瑩之多藏法書名畫能作窠石墨梅學楊補之畫

寒雀爪喙生動不下錢玉潭珊瑚網參圖繪寶鑑

高松聲字傳谷諸生構水肥齋于西郊焚香賦詩淡如也

書法直入二王臨摹奪真高故王姓有從弟淑民字子

逸筆法子昂與松聲頡頏

駱文衡字季銓筆法宗王與周天球王穉登結社論書著

有字學原委以上嘉興湯志

董仲敬善觀天文諳推步之法任欽天監挈壺正志柳
胡齋初名浚字元海永樂間陶莊人徙居魏塘賣卜于市
受君平術於袁杞山同游金陵提點姚一山奇其術以
二人薦杞山稱疾不行齋赴召授欽天監刻漏博士時
上新作殿命之卜齋曰某日某日午時當燬上怒囚之
以待至期倩獄卒覘視返報曰午過矣服毒有頃殿果
焚上急召齋死矣先是召命初下袁爲胡卜得乾之五
爻袁曰五爲君升陽在四子命又午矣其錫名之慶乎
四爲淵而五居淵上淵而大者乎以草莽之臣踐五位
終非吉兆五爲火丁者壬之合也遇火則危矣後聞賜

名齋袁曰驗矣死不遠矣果因殿焚而卒子旻昊昱昂

皆精占筮嘉興志

許敬字孟寅感化鄉人世以醫名治口齒者許爲之最宜
德間院使蔣主善薦入內院英宗患喉風更數醫勿效
敬進絳雪噙之遂愈拜御醫賜敕獎諭著有經驗方三

卷袁志

及珪字廷肅魏塘人精于醫一婦姪及八月卧不語珪曰
此內經所謂瘖也不藥當自愈有男子請診珪曰此疾
不至死然脉無生理過三日當投劑期內忽溺死人感
異之珪婿袁祥博洽高曠不屑爲醫珪以秘經授之祥

曰建文御極四年不修實錄忠臣死事泯沒無傳醫經

特屑屑耳祥有女遂擇錢萼為壻使授及術而已薄游

南都編尋博採作革除私記四卷建文編年四卷萼精

受術輯醫林驗海一編凡四十卷

兩浙名賢錄
參嘉興湯志

陶冶字大治幼孤事母孝能詩尤工畫山水花卉瀟灑脫

俗好畫大士像慈嚴兼具結茆武林靈鷲山自號樵隱

季如泰字大來鹽官人徙居嘉興畫山水人物最工細游

都門畫卷傳入青宮貞皇帝潛龍時一見稱賞諭繪西

湖景及牡丹數種

以上嘉興湯志

談時雍號繼巖世嬰兒術冠一時晨興遠近抱嬰兒就視

者每三五十人酬以金十受二三也子孫世其術復巖

瑞巖宏巖皆有名

續見聞雜記
參嘉興何志

希道道入嘉興僧也深於繕身之術又擇用日辰可代藥

餌嘗過海州司馬韋敷見敷鑷白曰貧道為公擇日更

之越五六日僧請鑷其半及生色若鰲凡三鑷之髻不

復變意其術出於遁甲故自稱希遁云

張渙字文甫號雲心畫師趙千里趙松雪種種逼真

以上嘉興

湯志

朱倬字廉夫工字學精篆籀古文及漢唐隸法做管夫人

書七十二篆金剛經人珍重之

袁志

董常工畫道釋像筆力細而勁拔同時有唐別鳳號岐山

寫照得神擅一時絕技劉志參嘉興湯志

王有禮休甯人爲嘉興諸生本姓沈精軒岐術善治傷寒

有尊生內編十卷葉向高序尊生外編八卷岳元聲序

皆行世袁志

徐名世號觀海諸生其先臨清人宋南渡來禾累世以醫

術著尤長兒科里人呼爲徐小兒名世以醫起家遇貧

者更加意療治著述甚富子謙字仲光亦諸生世其術

著有仁端錄專言治痘疹法能補前人所未備嘉禾徵獻錄

常效先號瀛泉少補諸生後棄去攻岐黃家言尤精痘疹

其門如市性簡僻賦詩娛老自號無繫居士著有金鏡

篇衍慶錄袁志

朱寶號肖海工書凡古人法書名畫臨摹逼肖雲間董其

昌亦時爲所惑嘉興湯志參圖繪寶鑑

王復元字雅賓幼爲黃冠得事文徵仲因精鑒古書學米

漫士畫山水類陳道復寫生類陸平亦能詩有天寒花

信少地僻草痕齊之句李日華紫桃軒又綴

吳秋林歛人寓春波里昆季皆好修不以貲著秋林尤高

尚門無雜賓時時襍被就羽人釋子假榻焚香烹茗意

蕭如也書法趙吳興繪事宗周東村而兼擅蘭竹紫桃軒又

綴

許紳字大紳其先嘉興人祖昇占籍江甯由名醫入為太醫院判永樂時扈駕至京遂家焉紳性敏慧究心醫術嘉靖時屢承召對有奇效遷轉不次至通政司掌本院事診療皇太子有功時冊立禮成游陞工部尚書卒遣官諭祭諡曰恭僖賞輯經驗方又刻鍼灸書并銅人圖像于公所

嘉興湯志

駱驥字子龍長水鄉駱家橋人事後母孝工吟咏時與金豐村燦范菁山言項少嶽元淇游尤究心岐黃之術察脈檢方侔於神巧自號懶翁作懶翁歌兼擅水墨白描

在黃癡倪迂間有言志集行世

嘉興湯志參袁志

陳遵字汝循嘗寓吳居城西寫花鳥如生賞鑑家不惜重金購之然非其人勿屑也暇輒鼓琴自娛陶然忘世

嘉興志

何志

魯得之字孔孫號于巖錢唐人僑居嘉興善書工墨竹由仲圭追踪文湖州李太僕日華最重之晚年右臂不仁

以左手畫風竹尤有致

書畫譜參杭州府志

沈雪坡林伯英俱魏塘人雪坡善梅竹伯英工花鳥皆師

樓觀

趙圖記

吳愛蕉布衣宏正間人畫法吳仲圭筆意

紫桃軒雜綴

周續之字臞鶴能琴得徐南山之傳曾將騷選諸什譜入

絲桐聽之音調奇古著有黃鐘律呂音四卷

褚勛字叔銘工書善畫臨摹亂真嘗治書練極纖細非市

中所有因名褚絹為莫雲卿李繼泉所重王元佐為之

傳

蔣汝成回回種也凡珍玩如古銅古窑古琴之類或有破

損經汝成手即完好如初稱一時絕技以上嘉興湯志

洪髹善造漆器精巧絕倫積久不敗名擅一時袁志

國朝

毛鳳祥字貞所善按脉識病源立起危症尤精傷寒年二

十即知名九十九卒八十年中活人無算嘉興何志

李琪枝字雲連諸生太僕日華孫珂雪子畫傳家學尤工

蘭竹竹垞朱檢討題其畫云前身定是梅花衲仍占春

波門外居是也從子含漢字南溟山水濃郁豐潤兼長

花草壯游南北最知名曝書亭集參畫徵錄

朱賓占字仲立客游江南不歸性情淡與物無忤工人物

嘗畫凌烟閣功臣圖蕪關權使見之遂攘其名以付雕

畫徵錄

張鳴岐住謝洞內善製銅為爐無不精絕項墨林見而異

之招居城中名大著竹垞朱檢討嘗咏之池北偶談參張輝祖新溪

雜詠
小序

黃元吉錫工也所造茶具種種精巧其色與銀無辨海內

咸珍異之

嘉興
湯志

張南垣名漣以字行少學畫得山水趣因以其意壘石成

山有黃大癡梅道人筆意挾術游江南一時名園邱壑

皆出其手董其昌陳繼儒亟稱之吳祭酒偉業為立傳

子然熊及孫淑傳南垣之術康熙間先後應

召供奉

內廷凡經營位置悉令然等董其役屢邀

恩賚及淑沒其術遂不傳

吳梅村集
參吳志

沈存周字鷺雛嘗從盛處士遠學詩書亦有致其所自見

則在於鍛以錫製壺多雅馴其形以僧伽帽為上次蓮

花次桃核凡雕鏤詩句姓氏圖印即世工書篆者不能

過

汪上樽范湖文
鈔沈存周傳

談允明字景巖幼喪父哀毀如成人孝二十年如一

日讀書精醫理有起死功著有醫旨心傳

吳志

戴泓字秋水生於康熙乙亥年居駙馬橋南少應童子試

不利棄去為蒙師以老嗜酒善畫墨竹多自題詩字仿

曹娥婢有自題一小幅云日暮瀟湘烟雨濛亂枝橫幹

鬪新叢迸流贏得澄江瀨祇恐山陰阻社翁風韻悠然

可賞新纂

李无垢錢唐人曾為太醫院醫士順治中至梅會里榜其門曰太醫院李无垢總理內外大小十三科方脈云云其所注本草經多發新義朱彝尊之妻病熱諸醫皆云不可治要之診視无垢笑曰君夫人所居閣四面俱木圍之木生火觸暑脈伏無他恙也亟以甘瓜井水投之不藥愈既而无垢客死所著書無存朱彝尊李无垢傳

顧銘字仲書能詩善畫瀟灑不羈檢討朱彝尊嘗贈之序

康熙辛亥

聖祖仁皇帝召寫

御容

賜金褒榮之時同郡沈行濮璜鮑嘉張琦俱以寫真名

吳志參畫徵錄

金陶能琴康熙間直

養心殿授鴻臚寺序班乞養歸康熙丁亥

聖祖仁皇帝五次南巡陶進古琴并太平奏萬國來朝琴譜一

冊

召對良久奏平沙太平等曲

賜金褒美

太平奏琴譜

姚節字竹友工詩文為人脫畧嗜酒醉後畫竹石小品有逸致醒時不及也

圖繪寶鑑續纂

薛珩字楚玉邑庠生隱于醫有醫案諸書刊而未竟構李詩繫

鮑楷字端人號棠村僑居維揚工花草師法南田山水亦

疎朗秀潤得古人意畫徵續錄

釋永徹字環照俗姓吳幼為僧于精嚴寺之清隱房遇一

僧秘授金針能開瞽目兼善蘭竹其徒孫聽竹亦工畫

世其術

陳恕字子如精醫術著有幼科述古子斯皇銘常世其業

以上吳志

尤錫九字亦夔楷法董華亭山水淡雅復精醫理遠近延

請無虛日製小舟榜之曰吟舫置茗椀書卷嘯咏其中

著有澹軒詩草梅里詩輯

倪鼎字丹成號竹村善人物其鈎染衣摺變化于古獨出

心裁烏程呂學見之推為近時第一圖繪寶鑑續纂

謝登號南屏有至性父沒于京登年未冠匍匐赴京扶襯

歸生平精于醫延治者日以百計試之無不驗凡醫所

入輒備藥餌以濟貧病者常集諸家疑似之說及歷試

等症著有醫驗二冊醫宗彙解女科要畧等書

談東巖允明孫世業醫其先有繼巖者以保嬰術稱神手

東巖繼之時以藥濟人不受值子宇康世其傳以上新纂

周笙字古聲精於醫著有靈素寶要六治秘書愛以墨寫

嘉興府志 卷五十一
罌粟花不輕畀人

梅里詩輯

錢臨字準可國學生因躋棄舉子業終身不娶精醫術專

以濟人為急遠近稱良醫纂有立齋醫案疏

續梅里詩輯

馬行素字介如讀書好古精于篆刻

陳巽介石印譜序

周嬾予性迂僻善奕推國手著有奕譜行世

周箕嬾子傳

薛廷文字魯哉性樸率耽詩苦吟擅繪事尤工荷花鮮妍

得生趣人以薛荷稱之著有聽雪齋詩稿

續梅里詩輯

郭鳳號友桐工詩善畫宗郭熙居梅會里茅屋數椽栽桑

種竹日與同里許煥金標楊漢籌相倡和著有茶譜雪

樵詩草衡門等集

伊志

田枌字頡雲居常豐里鍵戶讀書精岐黃術著醫門八法

六十四卷與方薰薛廷文為布衣交詩善狀村野景物

有忍冬書屋稿

南野草堂筆記

盛如柏字新甫精醫術博究素問難經諸書兼擅書畫篆

刻于

項暎薇字朱樹樵李故事自沈氏德符著野獲編人物風

土詳已至賓祭婚喪衣飾飲食時尚好惡之習未及也

暎薇續編之曰古禾雜識貢生王壽更增補附梓

新纂

陸允治字虞傳元景春處士之後世居里仁鄉東圩數百

年儒素家風齏鹽寒冷賣畫自給工畫蒲桃香生色活

康熙時年已篤老松江王儼齋司農延至家欲久款之
辭曰山澤癯不能廁公卿末坐也酬以金不受于志

洪榮字天樹住篁里西圩丁字谿西洪家舍自明時起至
榮補學官弟子者凡十二世家饒裕有亭館之勝康熙
時人物阜安與其弟棠招邀勝侶文讌無虛日畫花卉

極工麗于志

唐岳字東巖住西圩南星橋北畫人物奕奕如生家貧屋
窄常安筆硯于六如庵其後人賣卜為活于志

胡大年字亭山號薊邨又號玉峯住東圩大中橋北賣煙
草葉為生涯讀書鼓琴蕭然意遠楷行書法歐陽寫叢

蘭老梅修竹奇石得王元章楊補之勝趣于志

王志和字體乾住東圩谿南家本土族多聞好古積書數
千卷積名人所鐫刻石印數百鈕畫牡丹花水墨設色

長卷巨幅工麗中有生趣于志

程崑字玉山先世休甯人來竹里住西圩劉家濱茅屋一

椽授經終老寫花卉清迥瀟灑無塵全染其筆端于志

王應奎字彙樞號裕堂住西圩劉家濱性嚴整嗜讀書作

客江右攬山川奇勝詩情益豪邁書學顏平原作山水

濃郁深湛不落近時窠臼于志

查馨字庭蘭號秋佩先世自海昌遷竹里少多病因作畫

嘉興府志 卷五十一
有東山孝廉梅壑老人家法于志

張錫字百朋號復哉國學生世居新篁里幼端穎就傅時聽塾師講禮記親有疾飲藥子先嘗之哭失聲蓋痛其父母早世也比長力學醫著素問傷寒論質疑二書乾隆辛卯夏武原當湖滯下病延染治活無算海鹽吳進

士懋政撰墓志銘于志

祝明揚名萬壽居梅里入武庠短小便捷精拳技又工詩畫時海疆不靖縣宰司薦往金山署中人見其貌俱藐王之主入設酒相款飲方半有長大漢請與角祝拂袖起一擊而踣其拳法有名滿地雅飛者可敵百餘人阮宮

保嘗欲拔其才亦卒不果至今化城庵壁梅花遺跡尚在詩稿已不可得惜夫于志

戴光曾字松門歲貢生家赤貧與弟光緒同精八法緒貧不能支賣字蘇閩渡僧橋有達官憐才招入署始鈔胥卒以筆墨保擢至河工同知光曾耿介不事干謁以明經終書法出入歐虞腕力清勁遠族子弟行世煥號少達學問老宿工書精醫字推家學新纂

俞廷槐字拱三居角里街弱歲食餼中年因人罣誤夙耽六書凡古文鐘鼎篆岐陽石鼓手自規撫工摹印白文宗程穆倩朱文宗朱修能旁通星學推算屢中著有鞏

山印略無嗣惟一女亦工篆刻飛鴻堂印人傳

陳元祚字師李號西麓新豐鎮人補博士弟子員舉業暇

馳情篆刻從崑臺徐廣文遊得其指授與同里曹種梅

江山毛天巖昕夕討論求刻者屢恒滿因哀集為西麓

印譜後復鄙棄之殫力註疏賦自述詩三十韻以見志

同上

沈仁昌字醴原天性肫摯築環碧草堂觴詠其中奉親游

憇山水翎毛花鳥皆臻妙品兩浙名畫記

翟大坤字子屋後病耳自號無聞子寄居吳門善山水兼

綜各家於倪沈尤合度意致蕭散寫生得古法子繼昌

號琴峯山水蒼古兼善花卉孫成基能繼家學墨香居畫識參

畫林新詠

陳俞字古虞從張庚游山水清朗尤長寫真子效文能繼

父業墨香居畫識

巢敬字林可或云釋氏寫真得僧性潔之傳山水師薛宣畫識錄

姚霽與弟霑俱善人物花鳥兼寫照圖繪寶鑑續纂

曹勛字輔南善人物耕硯田齋筆記

張琦字王奇曾鯨弟子寫真推獨步畫識錄

李鏞字山濤善山水畫蘭法何其仁能取其長而滌其習

兼精金石篆刻畫識錄

嘉興府志 卷五十一
沈韶字爾調寓金山曾鯨弟子工寫真人物士女秀媚絕

俗曝書亭集

沈行字行嘉工寫真沈崑善人物山水得石田風味沈炳

字勉齋善山水花卉畫史彙傳

夏大貞字吉庵善翎毛巨幅屏障不假籌思花卉稱能品

圖繪寶鑑續纂

郁榕字蔭城號葯農蘭竹有揮灑自得之趣族弟維垣號

鶴汀亦擅蘭竹書法蘇長公墨香居畫識

金步簡號湘波諸生澹泊寡營善書畫父永昌自號醉墨

與錢鐸石曹慈山諸詩老唱和有凝雪書屋吟稿寫蘭

竹高潔無俗氛步簡繼踵以墨蘭名行草亦瘦勁新纂

仲泰字濟川太學生父世俊外科泰博覽方書尤深於素

問難經能洞澈癥結同里某病瘧轉痢切脈曰病入厥

陰仲景無治法卒如所言楊某觸暑倒地視之曰脫症

也與以回陽飲家人疑以問其戚徐敬齋徐亦精醫批

方後云非仲公不能書非敬齋不能知急服之應手愈

姑蘇某宦婦冬月患奇症耳仲名相迎仲謂症係伏暑

因曝衣餘熱未盡驟篋絨之御裘時由毛孔吸入耳投

一劑卽瘥竹里朱某舖生徒賭飯甲過飽悶絕六脈均

伏仲令進參湯半時許腹雷鳴俟脈復再投消導劑卽

愈一日風阻乍川聞哭聲詢係難產死仲謂產無死症
出已稜煎灌以導其氣逾時兒下母甦賦性豪邁喜購
書講有用之學撰老醫一得痘疹仁端錄未刊新纂

胡金城字德凝棄儒業醫嘗謂貧者求方勢必萬不獲已
延請必立往製肺露治嗽上氣疾名於時子春田承父
業精治疫求方者農而窘不索酬反贈以藥鄉里稱有
隱德德凝自撰楹聯云言易招尤得意時少談幾句書
能益智會心處多讀數行見道語可醫心性非僅以術
名家撰醫要便讀八卷朱觀督其鎮序之新纂

懷振熙熟壬遁善占候賃居古張沙里俞富安家晨必占

課每晴行忽帶雨具果無愆期某年臘為富安米舖水
閣前築水椿按方位正值年煞同邑風鑑梅長鈐聞匠
邪許聲怪詢其故曰日干與富安年庚均氣旺能尅制
決無恙厥後隆興橋市集與旺閱二十年著作皆談象
緯惜未成書新纂

沙木字青巖精小學考訂源流著藝文脩覽子神芝字笠
甫號鷗爽性蕭冷工篆隸行草下筆中鋒不以險僻取
勢鄧完白書出時尚一變然不以鄧書廢也客居盛湖
久多結翰墨緣新纂

徐用錫號晉齋居常豐里畫山水宗麓臺能為巨幅嗜酒

飲少輒醉醉輒索紙與人塗抹興盡乃止亦能作五七
言詩時有天籟同里陳翔鳳字來儀號丹霞山水宗法
王圓照鑑下筆不苟晚年筆意時近沈石田啟唯目短
視又常服賈往來舟楫間故所作不多新纂參墨
林今話
方惟寅字蘭陔援例得議敘席祖業甚豐好結客嫺六法
得錢塘高塏指授晚歲有書名新纂

流寓

周

范蠡字少伯楚人常寓構李侗儻有深謀越王句踐用其
計遂報彊吳觀兵中國號稱五霸范蠡既雪會稽之恥
以大名不可久居乃乘扁舟浮於江湖變易名姓適齊
為鴟夷子皮之陶為朱公今城南范蠡湖其所游息處

也

史記貨殖傳參
袁志嘉興湯志

案少伯寓禾越絕書史記未有明文第占蹟流傳名湖
名宅名橋名鴨載在圖經往往而有幽湖有范蠡泛舟
處相傳扁舟浮海始於
此舊志列流寓今仍之

唐

裴休字公美濟源人擢進士第舉賢良方正異等歷監察御史兵部侍郎領諸道鹽鐵轉運使進同中書門下平章事休為人醞藉進止雍閒宣宗嘗曰休真儒者然嗜浮屠居常不御酒日習歌唄以為樂當世嘲薄之

唐書本傳

參吳志

宋

錢顛字安道無錫人以金部員外為殿中侍御史王安石行新法顛極論其弊貶監衢州稅徙秀州遂卜居焉家貧母老勺貸親舊以給怡然無謫官也蘇軾遺以詩有烏府先生鐵作肝之句

宋史本傳參至元志

毛滂字澤民江山人政和間守是邦因家焉先是東坡守杭滂為法曹坡宴客有妓歌惜分飛詞坡問誰作妓以毛法曹對東坡語坐客曰郡寮有詞人不及知某之罪也滂因此得名著有東堂集

至元志

李曾伯字長儒潭懷人丞相邦彥之孫徙居嘉興第進士持繡斧督餉運兩分漕節七開大閩宦轍幾徧天下旋起旋罷官至觀文殿學士卒贈少保曾伯初與賈似道俱為閩帥邊境之事知無不言似道嫉之不竟其用著有可齋類稿

宋史本傳參至元志

朱敦儒字希真洛陽人以詞章擅名能書兼繪事三召皆

固辭後復以薦起賜進士出身為祕書省正字遷浙東
提刑罷歸僑居嘉禾構讀書堂于南湖濱陸放翁嘗詣
之聞笛聲自煙波間出行者曰此朱先生吹笛聲也

宋史

葉時字秀發杭州人登進士甲科歷事四朝累官至龍圖

閣學士明性命道德之學尤邃周禮晚居嘉興著禮經

會元及竹塹詩集卒諡文康

柳志

方誼字賓王桐廬人乾道四年侍父務德侍郎徙居郡城
為朱文公門人文公集中多相與問答語家有希賢齋

扁亦文公書

至元志

姜處恭字安禮長山人遷居嘉興九歲而孤大母父母皆
散死他州不能葬乃營衣食治墳墓收拾諸櫬得聚葬
既而買田置屋賙卹窮乏雖不以科目自達而徵渡江
凋落之後奮寒士單薄之習教二子輝郜皆成進士

姜處恭墓誌

葉適

洪芹适之曾孫以祖蔭入官登進士第歷官將作少監屬
詞臣無當上意丞相程元鳳言當今地望無踰洪芹者
進兼翰林直祕書少監權禮部侍郎中書舍人兵興詔
書所至聞者奮激葢芹所草也遷禮部侍郎帝銳意嚮
用竟以論罷寓居嘉興怡然自適咸淳初起知甯國府

分省人物考

王明清字仲言汝陰人甫十歲朱希真徐敦立過其父所

詢以國史中事應之無遺慶元間居甥館于嘉禾官至

朝散郎與父雪溪兄仲信俱有史才嘗剴切上封事是

時南渡以來老成凋謝明清哀集軼事編為揮塵錄及

投轄錄清林詩話玉照新志至元志參

李鳴復字成叔瀘州人嘉定二年進士寓居嘉興理宗朝

參知政事後為福建安撫使予祠卒於嘉興子公夬公

晉皆典郡宋史本傳

趙孟僴字月麓宋宗室其先家黃巖文天祥見之曰瑚璉

器也後天祥開闢江東浙西俱辟以行及召赴闕孟僴

雷吳僅五十日宋亡元兵執孟僴欲官之固辭以疾遂

去依親友以居絕口不談宋事號三教遺逸居嘉禾天

祥卒為文祭之臨終口占曰王室之懿文山之客持此

寸心千古忠赤所著詩文名湖山汗漫集趙圖記參

殷澄字公源華亭人家富好施人目為殷佛子元兵壓境

澄保聚未下元將楊埽地命屠其境澄叩軍門曰民猶

水也水順則流逆則激今將軍不廣好生之德顧欲盡

勦斯民乎楊怒欲斬之澄厲聲曰殺一人活千萬人死

安足惜楊感悟一境獲全丞相伯顏聞而義之授澄軍

民都總管澄曰大宋之亡吾以親故不與俱亡乃獨不能逸乎遂去放浪九峯三泖間號泖南浪翁與陶菊隱

趙孟僴稱秀州三義 趙圖記 參吳志

黃正孫字長孺慈谿人宋宗正少卿震之孫宋亡絕意仕

進魏塘義士吳森聞其名迎致之遂徙居焉正孫履行

疏粹為學者領袖晚自號尚綱翁子玠另傳 黃潛黃君墓誌參趙

區記

元

顧阿瑛名德輝字仲瑛崑山人幼警敏善記誦喜購古書名畫鑒賞無虛日元季舉茂才辟會稽教諭不就張士

誠入吳遂遁跡嘉興之合溪營別業居之漁釣五湖三

泖問自稱金粟道人所著詩曰玉山璞稿在合溪有暮

雲集諸書 殷奎墓志參 構李詩繫

明

陳世昌字彥博錢塘人力學工文不慕祿仕至正間由布

衣徵授翰林編修奉敕代祀海上值道梗遂畱嘉興作

南湖賦傳誦於時授徒養母張士誠據平江屢致不屈

洪武初徵修禮書授太常博士尋以母老辭歸卒著有

希言集 劉志參構李詩繫 案世昌所著希言集各志 俱作希賢構李詩繫注云作希賢誤今改正

沈鉉字鼎臣錢塘人元末道梗與同邑陳世昌俱畱於禾

鉉博學邃於春秋洪武初知石首縣橋李詩繫

案鉉與陳世昌傳天啟嘉興縣志康熙袁志俱云洪武初召修禮書以母老辭歸鉉著希賢集世昌著希言集初橋李詩繫及嘉禾徵獻錄鉉並未徵修禮書亦未載有專集兩志之誤或以同作寓公彼此舛錯致傳語亦相彷彿耳

佛耳

牛諒字士良東平州人元末寓嘉興與鮑恂張翥諸人善

自顏其堂曰尚友明初應詔除翰林院典簿同學士張

以甯使安南御製歌詩賜之歷陞禮部尚書著述甚富

靜志居詩話

徐一夔字大章天台人博學善屬文危素薦為建甯路教

授元末自天台避兵徙嘉興寓居白苧里有屋三四楹

牖外有一大柞因作獨柞軒記以見志與義烏王禕善

洪武二年詔纂修禮書一夔與焉明年書成將續修元

史禕方為總裁官以一夔薦一夔遺書不至未幾用薦

署杭州教授召修大明日歷書成將授翰林院官以足

疾辭賜文綺遣還著有始豐稿行世明史本傳參

高巽一作遜志字士敏元末僑居禾郡為文深醇典茂成一

家言以薦為鄖山書院山長洪武二年徵修元史為翰

林編修累遷侍讀學士未幾引退又召為吏部侍郎以

事去官謫居胸山建文間召為太常少卿壬午靖難兵

渡江巽志遜去入永嘉雁宕山其門人文淵閣侍書蔣

兢亦潛踪于此異志病卒兢經紀其喪葬芙蓉峯北後

諡文忠著有嗇庵集趙圖記參靜志居詩話

蔣兢字惟敬宜興人寓嘉興建文時詔舉人才考授文淵

閣侍書授密旨從黃子澄走姑蘇至楊任所子澄遣兢

往甯波會合知府王漣發兵守錢塘逾海抵閩粵未至

成祖正位子澄與任被誅兢亡匿山澤稱東海波臣游

楚蜀二十餘年歸著有瑣尾日記友陶軒稿樵李詩繫

高岳字彥高本畏吾氏高昌裔也博洽有才華儀容秀整

人望而敬之工草書丹藥卜筮之術咸究識之洪武間

薦知雲陽縣免官家郡城又嘗寓魏塘云趙圖記劉志案

俱作高岳袁志吳志誤作邱高今改正

邱民字克莊揚州人州被兵攜妻子奔浙西僑居郡中入

郡庠訓生徒自給至正壬寅用流寓籍以毛詩就試與

選洪武初為松江學官歷至禮部侍郎樵李詩繫

孫作字大雅以字行江陰人至正末挈家避兵於吳張士

誠聞而廩祿之謝去後為嘉興府學教授遂寓居南湖

洪武六年召修日歷書成授翰林編修以老病乞外除

太平府教授八年選天下學官內任作與焉廷對第一

授國子助教歷司業為文醇正謹嚴勿尚異同著書十

二篇號東家子有滄螺集十卷曝書亭集參樵李詩繫

孟觀亞聖五十四代孫祖忠厚扈宋南渡封信安郡王賜

第姑蘇子孫遂為吳人明初觀應人才詔授永甯知縣

有治行陞吳府審理副避兵寓嘉興之清風涇浙江通志

桑慎字仲修世居常州遷嘉興性孝友苦行力學洪武初

為監察御史見事廷諍朋友有過輒面折之以行部海

南奏誅衛使張榮坐不避八議罪謫瓊州已而召還浙兩

名賢錄

唐肅字處敬山陰人至正十九年舉于鄉為嘉興學正遂

家焉明初以薦擢為編修罷歸肅文章稱大家與上虞

謝肅齊名時號一二肅著有丹厓集曝書亭集參構李詩繫案肅輓郭秉心

詩有吾昔居秀州友有徐一夔句又高啟有送唐博士移居樵李詩故增八

吳阿真字無櫻台州諸生方孝孺之甥孝孺赤族株及姻

戚阿真避難卜居樵李之梅溪師模道範咸謂得正學

一脈娶婦生二子永樂九年御史陳瑛密奏逋臣結死

黨下令捕之真被逮託次子于外家挈長子往戍開平

嘉興湯志

戴瓊字子玉休甯人嘉靖間以博士弟子入太學試禮部

儒士第一時分宜竊柄引疾南還與禾中項承芳李衷

毅衷純輩訂交購宅梅會里顏曰百順堂肆情詩酒洎

如也卒于梅里子孫遂占籍焉著有燕臺草休甯縣志

沈應禎其先常熟人以武功封家于春波里為諸生日往來煙水間觴咏松下稱隱松子文悌神宗朝以孝謹聞

袁志

吳懷賢休甯人僑居嘉興以中書舍人辦事誥敕房楊漣奏劾魏忠賢二十四大罪懷賢擊節稱快加圈評旁注工部員外吳昌期督理惠王府第糾劾侈冒忤璫撤回懷賢遺書稱之有事極必反之語其僕得罪於懷賢竊其所評楊疏及遺昌期劄密首厥衛忠賢怒令校尉縛懷賢及其妻邱氏子道昇送鎮撫司懷賢斃杖下昌期坐削奪崇禎初道昇上書訟冤贈工部主事

嘉興湯志

汪珂玉字玉水徽州人僑居嘉興崇禎中官山東鹽運使

判官畱心著述輯珊瑚網鴛水月社篇等書

靜志居詩話

朱一是字近修海甯人徙居梅里崇禎壬午舉人早年名

重復社入都欲上書言事遭亂絕意仕進披緇授徒詩

文膾炙人口與同里屠曠范路稱三友著有為可堂集

子願為字求侯放情詩酒有紫薇軒存草

嘉興何志參曝書亭集

范路字遵甫蘭谿布衣流寓嘉興潛心性命之學博通今

古晚開靈蘭館賣藥長水市乍愚乍智人莫測其所詣

門人私謚貞簡先生有靈蘭館集

靜志居詩話

周宗彝字五重本海甯人居硤石山幼有至性嘗從倪元

璐游崇禎己卯中順天鄉試不第歸時盜賊充斥捐資設關廂水柵為一鄉保禦甲申自盡死妻卜氏抱三歲子與妾俱躍池中弟啟琦等闔門死者四十八人弟瑋光尚死守硤石破被數創死

邱岳字梁父徽州人諸生崇禎末流寓嘉興素任俠與刑部譚貞良善貞良入閩偕之行見事不可為棄走山中

至潮州死以上嘉禾徵獻錄

錢敬忠字孝直鄞縣人自甯國守罷歸寓居嘉興歿後殯于硤石之審山查職方繼佐嘗為之銘後歸葬于鄞初敬忠于萬歷四十七年會試中式以父若賡前為臨江

知府得罪論死繫江西獄三十七年乃不奉廷對跪闕下三疏訟父冤若賡始得釋敬忠旋成進士以刑部郎

出守事具全祖望所為玉塵錢公神道表伊志

胡山字天岫宜興縣學生僑居梅里先世蘭谿人父沆有才畧嘗客項城以奇計破流賊有全城功山負才兀傲著書賣藥舌耕以養母詩格超邁俯視一切著有葑汀

寓廬東武諸稿明詩綜參梅里詩輯

國朝

朱昇字子旦海甯人徙居梅里順治己亥進士除東昌府推官時有于七之獄案連數郡累歲不決昇悉心研鞫

矜釋甚衆改峩眉令務去煩苛與民休息旋引疾歸著

有蜀中草

梅里詩輯

蔣平階初名雯階字斧山華亭人爲嘉善諸生游陳子龍之門後避地居嘉興久之徙越中卒詩宗盛唐常與同郡計子山陽羨陳其年蕭山毛大可錢塘丁澎互相酬

倡

橋李詩繫

陳繼新字澹持錢唐人諸生少客維揚慷慨任俠嘗從史閣部軍南都陷避地禾中時項子毗被禍論死陳匿其幼子爲己子攜之遊京師隱於醫久之事定仍歸寓禾三十餘年後項子天朱竹垞檢討有詩贈之云誰肯艱

難全李燮未容名姓亂韓康一日有所感憤買小舟至

郡西龍淵寺自沈於河年已七十矣

椽村筆記

戴爲轂字季環休甯人因贅禾中吳氏遂寓居焉性孝友念父母不逮養終身不茹葷祖墓在新安地卑溼隆冬却絮不御曰先人體魄未安敢戀輕煖乎後遷葬烏程羅山偕叔兄爲秩至菱湖舟覆漁者援之爲轂呼曰吾兄未有後亟援之漁者如言拯爲秩爲轂漂淺渚竟得

兩全

湖州府志

蔡耀字遠士德清人移居嘉興之梅里國學生天資穎悟讀書觀大意詩歌書法皆有名性疎懶時同里朱願爲

以狂自喜人稱狂朱懶蔡著有山草堂詩集

浦越喬字副工國子監生甯波人移居梅里經學湛深尤

精史傳刊古文曰聊宣橐具見根柢生平南游滇黔北

歷燕代所為詩得江山之助著有啾發稿

許箕字巢友海甯人移居梅里品行孤高不求聞達行楷

書瘦硬通神人以卷冊乞書者多寫已詩應之曹侍郎

溶稱其詩格清邁書法秀拔論其人品直比之嵇阮云

著有捫膝軒詩草

以上梅里詩輯

徐斐然字鳳輝歸安縣學生僑居梅里多聚

本朝人古文見即手抄年及八十兀兀鈔訂不輟其言曰傳

青主雅不喜歐公以後之文曰是所謂江南之文也黃

黎洲論文以為唐以前句短唐以後句長唐以前字華

唐以後字質唐以前如高山深谷唐以後如平原曠野

故自唐以後為一大變而文之美惡不與焉然予觀自

宋以後有學為唐以前之文者率禿吃不可讀故知江

南之文其足為今之圭臬也審矣著有敬齋存稿及二

十四家文選今文偶見諸書

伊志

宗昱字懼聞山陰諸生舉鴻博不赴晚寓禾中其子為松

江倅迎養官舍尋卒著有大學古本解弄餘草

于志

李紹祖字述軒錢塘人由縣丞官至綿州直隸州知州廉

潔勤慎興利除弊西川人稱頌不衰年老致仕僑寓嘉興十有餘年治家儉約敦孝友凡同善恤糶禦寒歲米無不竭力扶助其行誼洵足風焉于志

戚芸字修潔德清貢生候選訓導性介而和處事詳慎爲

人任緩急不受報工詩五言尤擅場卜宅嘉興大奚家

橋積書數萬卷題其室曰寶硯且以名其集謂寶其大

父侍講學士瓶谷公賜硯也子嗣曾字以矩增

貢生服膺朱子近思錄起居儉約書箴銘滿置座隅省

試屢薦不售嘉慶丁卯揭曉後首藝梓入闈墨隻字不

更易咸謂事宜申訴嗣曾恐興大獄卒置不校著錢法

志德清經籍志蟬味軒隨筆孫士廉士元士昂先後貢

成均文詞淵懿學有本原士彥入詞垣曾孫行亦科甲

蟬聯家聲丕振于志兼探戚氏行述補纂

邢澍字雨民甘肅階州人乾隆庚戌進士官長興縣升南

安知府以病歸寓居郡城丁家橋十餘年行端學邃著

有全秦藝文志兩漢希姓錄金石文字辨異寰宇訪碑

錄舊雨詩譚守雅堂詩文集于志

查元偁海昌籍世治鹺業父刑部郎中世倓始遷嘉禾元

偁登嘉慶庚申京兆榜戊辰成進士仕至江南福建貴

州各道監察御史權戶禮兵刑四科給事中論事侃直

以漕章劾江督暨漕河兩督又進籌海運疏解組仍席
 故業居東郭外奚家橋子紹籤號玉彭道光丙午舉人
 援例候選郎中以親老不仕晨昏定省外朔望必具衣
 冠拜累世篤友愛元偁以同產祇一女弟贅壻於家邸
 舍財帛均分之錢亦友愛仲弟弟受嗟務累售已產償
 所負不濟則躬馳北直沽親為經紀貲雖中落門祚仍
 蕃昌焉其族人名開名虞昌已入嘉善籍

錢泰吉海昌備志暨查氏

家乘

馬洵字伯泉號小眉海昌籍家梅會里豪於貲以報効授
 道銜性耽風雅多藏書籍騷人墨客接引無虛日詩筒

往返與吳榕園郭頌伽葉改吟倡和為多其游韜光有
 竹影綠僧衣句新麗不減晚唐暮年詩境沖淡一歸自
 然黃安濤為校定遺稿六卷曰五千卷室詩詞集今其

曾孫已占籍嘉興入學

新纂參孫灑選鷗盟集引語

李華清號補未原籍江蘇嘉定縣父廣芸守吾郡惠政清
 風口碑猶在嗣擢福建汀漳龍道以朱履中獄被誣自
 盡逮平反冤雪眷屬歸膠城又為族眾所凌無以自存
 遂棄舊居卜宅郡城報忠坊楹有傳書家無檐石以諸
 生援例授鹽經歷著善補過齋文鈔子用光籍秀水由
 歲貢選授分水訓導

新纂

相變堃原名清字寅甫仁和縣人與從兄槐全寓嘉郡並

噪文名變堃尤與平鏗朱光輩有文中龍虎馬之譽詞

賦藻麗富有才華道光己亥膺鄉薦旋改籍嘉興咸豐

壬子以進士銓部曹假歸不逾時卒

新纂

車伯雅字少芸錢塘學生父宸英秉鐸吾郡後遂賃居學

左善文辭雖詼諧信口成章駢語秀琢逼近六朝郡守

瑞端節激賞之子某入嘉興籍

新纂

